

मरकुस रचति यीशु मसीह का सुसमाचार मरकुस उन लखिसद यीशु मसीह अन बारा दा खुशखबरी परचिय

यीशु उन जीवन इन वर्णन माळोद नाक कतिब दा टु ऊंद कतिब मतलब मरकुस उन लखिसद खुशखबरी परचिय ईव नाक कतिबगोळी खुशखबरी अनतार यदुर्द सोपा मतलब वळ्लीद कल्याणकारी बातणी या वार्ता आगतद

यीशु उन सोत्तुर बाददा ईव नाक खुशखबरी अनुक्रम मत्ती मरकुस लूका अदकि यूहन्ना इंदुर लखिसयार ईव नाकु दा टु मरकुस रचति खुशखबरी सब से स्यांळ्द कतिब आद हापाळ ग्यानी लॉकुरद मान्यता आद कि मरकुस रचति खुशखबरी बाकी नव मुर खुशखबरी इन पयले यीशु उन जनम इन ६५ टु ७० वर्ष इन बाददा लखिसकु आग्याद लखिसोद हदिळोद कारण मतलब रोम ईलीद मसीह अन मंडली अन्द मनोबल वादुसोद अदकि प्रोत्साहन माळोर साटी ताकोमकु आत.

ईव मरकुस याव हुन? प्रेरति पौलुस अदकि बरनबास इंदुरद ईव हारोदव सहकारी ईवा रा यूहन्ना मतलब मरकुस रचति खुशखबरी इन लेखक मरकुस आंदुर सांगुळ पयला मशिनरी यात्रा अन न्याड्या दा अच बटिकु होगदुर देल आऊन प्रतषिठा अक ठेस हत प्रेरतिगोळ १३:१३ बाददा ईवा मरकुस बरनबास उन सांगुळ सेवकाई दा शामलि आगत कांळ्सदुन. प्रेरतिगोळ १५:३७-३९, अनुसार मरकुस, पतरस ऊंद हात्ती नव संगी ईरोन. १ पतरस ५:१३ ग्यानी लॉकुरद हगि मान्यता आद कि याग मरकुस यीशु उन जीवन इन अदकि सेवाकार्य अक आमने सामने नोळीदील

तरी भी पतरस उन साक्षी अन आधार मा आव आऊंद खुशखबरी लखिसदुन. ईद मरकुस उन खुशखबरी इन आधार इन मात हुन.

मरकुस रचति खुशखबरी इन येढ्ढ बारा दा मतलब, यीशु उन खरा चेला बनसोद अदकि आखरी इन भवषिय अन बारा दा यीशु उन द्वारा कोळ्द शकिषा.

मरकुस रचति खुशखबरी दा यीशु उन “वनिमूर दास, सेवक” अदकि तान आप्प उन इच्छा पुरा माळोर साटी हमेशा तयार हगि “परमेश्वर उन प्रयि पार” ईव येढ्ढ रूप दा दरसुसकु आन. हांग अच मरकुस दा यीशु उन द्वारा माळ्द चमत्कार इन बारा दा यक्कुल से यक्कुल लखिसकु आग्याद. ईद खुशखबरी इन समापन यीशु उन चेलागोळी कोटकु आत “महान आदेश कोटकु आग्याद.”

रूप-रेखा

१. बपतस्मा कोळावाळा यूहन्ना अदकि यीशु उन बपतस्मा १:१-१३
२. यीशु उन द्वारा गलील प्रदेश अदकि परसिर दा चमत्कार माळोद १:१४-९:५०
३. गलील टु यरूशलेम ताका यीशु उन यात्रा अदकि मंदिर दा बरोद १०:१-१२:४४
४. यीशु उन द्वारा भवषिय अन्द बारा दा बातणी कोळोद १३:१-३७
५. यीशु उन मृत्यु अदकि पुनरूत्थान अदकि महान आदेश १४:१-१६:२०

यूहन्ना बपतस्मा कोळावाळा अन्द प्रचार
(मत्ती ३:१-१२; लूका ३:१-१८; यूहन्ना १:१९-२८)

1 परमेश्वर उन पार, यीशु मसीह अनन्द खुशखबरी* इन सुरूवात.
2 जसा यशायाह भवषियवक्ता† अनन्द कतिाब दा लखिस्कु आद,
परमेश्वर अंदुन,

“नोळ, ना नीन मुंद तान बातणी कोळावाळा अक कळुतीन,
जो नीन साटी हादी तयार माळ्यान.”

3 आळी दा ऊंद कारावाळा अनन्द आवाज केळ बरेत्यादः कि
“प्रभु उन हादी तयार माळी, अदकि
आऊक होगोर साटी सळकगोळी सरका माळी.”

4 बपतस्मा कोळावाळा यूहनना आळी दा बंदुन, “जो
बपतस्मा‡ अनन्द प्रचार माळतोगोन, अदकि पापगोळ्द माफ
अनन्द साटी मन तरिगुसोद बपतस्मा कोळतोगोन अदकि
अनतोगोन, परमेश्वर नीम पापगोळी माफ माळ्यान.” 5 पुरा
यहूदिया अनन्द प्रदेश, अदकि यरूशलेम इन सप्पा ईरावाळे
नवासी होटकु आऊन हात्ती होदुर, “अदकि तान पापगोळी
मान्सकु यरदन गांगा दा आऊन से बपतस्मा ताकोडुर.”

6 यूहनना ऊँट इन चुट्टीगोळ्द फळक्या हाककु अदकि नेळु
मा तोगुल इन पट्टा कटकु ईरतोगोन. फाफा§ अदकि आळी
दाकळोद शयद तनितोगोन, 7 अदकि हगि अंद अंदकु प्रचार
माळतोगोन कि, “नान बाददा आव बरावाळा आन, जो नान से
यक्कुल ताकतवर आन, ना रा ई लायक भी हैलेच कि बांगकु
आऊन काल ईनव केरू तेगु सकाईन. 8 ना रा नीमी नीर दा
बपतस्मा कोट्टीन, लेकीन आव नीमी पवतिर आत्मा देल
बपतस्मा कोट्टान.”

यीशु उन बपतस्मा

(मत्ती ३:१३-४:११; लूका ३:२१-२२; ४:१-१३)

* 1:1 १:१ शुभ बातणी † 1:2 १:२ भवषिय अनन्द बारा दा हेळावाळा ‡ 1:4
१:४ नीर दा मुळकुसोद अदकि तेगोद वधी § 1:6 १:६ टडिडियाँ

9 आ दनिगोळ दा हगि आत की यीशु गलील इन नासरत नगर टु बंदकु, यरदन गांगा दा बपतस्मा कोळावाळा यूहन्ना से बपतस्मा ताकोंडुन. 10 अदकि याग आव नीर दा टु होटकु म्याकुच बंदुन, रा तुरन्त आव स्वर्ग इक खुल्सत अदकि पवतिर आत्मा अक कबूतर इन घाई तान म्याकुच ईळुतेला नोळदुन. 11 ✨आग स्वर्ग दा टु ईद आकाशवाणी आत की, “नी नान प्रयि पार हुय, ना नीन देल हापाळ खुश आईन.”

यीशु उन परीक्षा

(मत्ती ३:१३-४:११; लूका ३:२१; २२; ४:१-१३)

12 आग पवतिर आत्मा तुरन्त यीशु उक आळी दी कळुत. 13 अदकि चालीस दनि ताका सुनसान जागा दा आऊन परीक्षा, शैतान उन द्वारा आगतेला ईरोद; अदकि आव आळी दाकळव पशुगोळ सांगुळ ईत्तुन, अदकि आग स्वर्गदूत बंदकु आऊन स्यावा माळतेला ईत्तुर.

यीशु उन स्यावा माळोद क्याल्सा अन सुरूवात

(मत्ती ४:१२-१७; लूका ४:१४,१५)

14 बपतस्मा कोळावाळा यूहन्ना अक बंदी माळदुर बाददा यीशु गलील दा बंदकु परमेश्वर उन राज्य अन्द खुशखबरी प्रचार माळदुन, 15 ✨अदकि अंदुन, “समय पुरा आगेग्याद, ‘अदकि परमेश्वर उन राज्य हात्ती होट्ट बंदाद; मन तरिगुसी अदकि खुशखबरी मा वशिवास माळी.’”

यीशु उन द्वारा नाक मेन हुडावाळेर इक कारोद आत

(मत्ती ४:१२-२२; लूका ४:१४-१५; ५:१-११)

16 याग यीशु गलील इन झील इन कनारा कनारा होगोन, रा आव शमौन अदकि आऊन वार्ट अन्द्रयिास उक झील दा

✨ 1:11 १:११ मत्ती ३:१७; १२:१८; मरकुस ९:७; लूका ३:२२ ✨ 1:15 १:१५ मत्ती ३:२

जार हाक्त नोळदुन; यतकी आंदुर मेन हुडावाळेर ईरोर. 17 यीशु आंदुर से अंदुन, “नान हदि बरी; ना नीमी मंळसागोळी परमेश्वर उन हात्ती ह्यांग तरतार अद कलसाईन.” 18 आंदुर तुरन्त जारगोळी बटिकु आऊंद हदि नळुली कुरतुर.

19 थ्वाळासा मुंद होगदुर मा, आव जब्दी इन पार याकूब, अदकि आऊन वार्ट यूहन्ना अक, इवांगा मा कुर्तकु जारगोळी सुधरूसतेला नोळदुन. 20 ह्यांग यीशु आंदरी नोळदुन हांगा तुरन्त कारदुन; अदकि आंदुर तान आप्प जब्दी इक मजदूरगोळ्द सांगुळ इवांगा मा बटिकु, आऊन हदि होटोदुर.

दुष्टआत्मा हतकु मंळसा अक चंगा माळोद
(लूका ४:३१-३७)

21 आग आंदुर कफरनहूम नगर दा बंदुर, अदकि आव तुरन्त आराम इन दनि यहूदी लॉकुरुद सभागृह दा होगकु उपदेश कोळली कुरतुन. 22 अदकि लॉकुर आऊन उपदेश केळकु सट्ट आगेदुर; यतकी आव आंदरी शास्त्रीगोळ्द घाई ईला, लेकीन अधिकारीगोळ्द घाई उपदेश कोळतोगोन.

23 आटोटीका, आंदुरद यहूदी लॉकुरुद सभागृह दा ऊंद मंळसा ईरोन, यारदा ऊंद दुष्टआत्मा ईरोद. 24 आव ईद अनकु चलिळास कुरतुन, “हे यीशु नासरी, नामी नीन से येन क्याल्सा? येन नी नामी नाश माळली बंद्या? ना नीनी अरूतीन, नी याव हुय? परमेश्वर उन पवतिर जन!”

25 यीशु आऊक दनकुसकु अंदुन, “सुंगा ईर; अदकि आ मंळसा दा टु होटबुळ.”

26 आग दुष्टआत्मा आऊक मुरकुळ्सकु, अदकि धोळ्द आवाज देल चळिलासकु आऊन दा टु होट बुळत. 27 इदुर मा सप्पा लॉकुर आश्चर्य माळतेला आपस दा मातचीत माळली कुरतुर, “ईद येन मात आद? ईद रा ऊंद व्हाशोद उपदेश आद!

आव अधकारि देल दुष्टआत्मागोळी भी आग्या कोळतान, अदकि दुष्टआत्मा भी आऊन आग्या मानसताव.”

28 अदकि यीशु उन हेसुर इन बारा दा ईद बातणी तुरन्त गलील इन आसपास इन सप्पा प्रदेश दा फैलुसेत.

यीशु हापाळ सा बमिर मंळसागोळी चंगा माळदुन
(मत्ती ८:१४-१७; लूका ४:३८-४१)

29 यीशु अदकि आऊन चेलागोळ यहुदी लॉकुरद सभागूह दा टु होटकु याकूब अदकि यूहन्ना अन्द सांगुळ शमौन अदकि अन्दरियास उन मान्या बंदुर. 30 अल शमौन उन आत्त मय देल व्हर्स मा बदिकु ईरोर; अदकि आंदुर तुरन्त यीशु उन बारा दा आकी हेळदुर. 31 आग आव हात्ती होगकु आकनि कय हुळकु आक इक येब्सदुन; अदकि आकनि मय तुरन्त ईळदोदव, अदकि आक यीशु अदकि आऊन चेलागोळ्द स्यावा-पानी माळली कुरतुर.

32 द्यावगान होती याग सुर्य मुळकेत रा आग लॉकुर सब बमिरगोळी अदकि आंदरी, यारदा दुष्टआत्मागोळ ईरव, आंदरी भी यीशु उन हात्ती तंदुर. 33 अदकि सप्पा नगर इन लॉकुर शमौन उन मान्ना अन्द दरवाजा मा बंदकु जमा आदुर. 34 यीशु च्याच मुंदरी जो अलग अलग प्रकार इन बमिरी देल दुखी ईरोर, चंगा माळदुन, हापाळ सा दुष्टआत्मागोळी तेगदुन, अदकि दुष्टआत्मागोळी माताळ गोटीदील, यतकी अव आऊक अरव.

आबना दा यीशु उन प्रार्थना माळोद
(लूका ४:४२-४४)

35 अदकि यीशु व्हातुर आगोर से हापाळ पयले, मान्या टु यदकु व्हार्या होटुन, अदकि ऊंद सुनसान जागा दा होगकु प्रार्थना माळली कुरतुन. 36 आग शमौन अदकि आऊन संगीगोळ यीशु उन खोज दा होदुर. 37 याग आव सकिदुन, रा आऊक अंदुर, “सप्पा लॉकुर नीनी ढुंढसेत्यार.”

38 यीशु आंदुर से अंदुन, “बरी; नाव मात्त येल्यारा आसपास इन ऊरगोळ दा होगता, की ना अल भी प्रचार माळईन, यतकी ना इदुरदा साटी बंदीन.”

39 ✨इदुरसाटी आव पुरा गलील दा यहूदी लॉकुरद सभागृहगोळ दा होग होगकु प्रचार माळदुन अदकि दुष्टआत्मागोळी तेगुतेला ईत्तुन.

कोढ इन रोग इक चंगा माळोद
(मत्ती ८:१-४; लूका ५:१२-१६)

40 ऊंद कोढ* इन रोगी मंळसा यीशु उन हात्ती बंदुन, अदकि आऊन मुंद ट्वांगरा टेक्सकु आऊन से वनिती माळदुन, की “अगर नी चाहास्या रा नानी शुद्ध माळ सकत्या.”

41 यीशु आऊन मा तरस तनिकु तान कय वाळुसदुन, अदकि आऊक मुटकु अंदुन, “ना चाहासतीन की नी शुद्ध आगेग.”
42 अदकि तुरन्त आऊंद कोढ इन बमिारी वळ्लीद आगेत अदकि आव शुद्ध आगेदुन. 43 आग यीशु आऊक चेतावनी कोटकु तुरन्त सार माळदुन, 44 अदकि आऊन से अंदुन, “नोळ, यारीकु येनु हेळबाळेत, लेकीन होगकु तान तान इक याजका† उक तोरस, अदकि तान शुद्ध आगेद बारा दा जो येनारा मूसा ठहरूस्यान अदरी भेंट येरस, की आंदुर मा गवाही आगुल.”

45 लेकीन आव मंळसा व्हार्या होगकु ईद मात इन हापाळ प्रचार माळली अदकि ईल ताका फैलुस्ली कुरतुन की यीशु बाक खुलेआम नगर दा ईला होग सकोन, लेकीन व्हार्या आळी दा ईरोन; अदकि नाकु दकिळोर लॉकुर आऊन हात्ती बरतेला ईरोर.

✨ 1:39 १:३९ मत्ती ४:२३; ९:३५
मंदर इन भेंट ताकोमावाळा

* 1:40 १:४० कुष्ट रोग † 1:44 १:४४

2

लकवा अन्द रोग इक चंगा माळोद
(मत्ती ९:१-८; लूका ५:१७-२६)

¹हापाळ दनि इन बाददा यीशु बाक कफरनहूम दा बंदुन, अदकि खबर फैलुस्त कि आव मान्या आन. ²बाक ईस लॉकुर जमा आदुर कदिरवाजा अन्द हात्ती भी जागा ईला ईरोद; अदकि आव आंदरी वचन केळसोन. ³अदकि लॉकुर ऊंद लकवा अन्द रोग इक नाक मळसागोळ कय देल नेगुकु आऊन हात्ती तंदुर. ⁴लेकीन याग आंदुर भीळ इन कारण आऊन हात्ती होग सकदील, रा आंदुर आ छत इक यदुर ल्यालमा आव नीदुरकु ईरोन, खोलस बुदुर; अदकि याग आंदुर अदरी बचिछ बुदुर, रा आ व्हर्स इक यदुर मा लकवा अन्द रोगी बदि कु ईरोन, आऊक ल्यालमा ईळसदुर अदकि व्हर्स इक हलिगुस बुदुर. ⁵यीशु आंदुर वशिवास नोळकु आ लकवा अन्द रोग इक अंदुन, “हे नान पारा, नीन पाप माफ आदव.”

⁶आग हापाळ नयिमगोळ गुरु जो अल कुरतकु ईरोर, आंदुर तान-तान मन दा वचिर माळली कुरतुर, ⁷“इव मळसा येती हगि अनेत्यान? इव रा परमेश्वर उन अपमान माळीत्यान! परमेश्वर उक बटिकु अदकि याव पाप माफ माळ सकतान?”

⁸यीशु तुरन्त खुद तान आत्मा दा ईद जान्स कोंडुन कि आंदुर तान-तान मन दा हगि वचिर माळीत्यार, इदुरसाटी आव आंदुर से अंदुन, “नीव येती तान-तान मन दा ईद मात इन वचिर माळेतीर? ⁹आसान येन आद? येन लकवा अन्द रोगी से ईद अनोद कि नीन पाप माफ आदव, या ईद अनोद कि येळ तान व्हर्स नेगुकु नळु अदकि टेटाळ? ¹⁰ना नीम मुंद साबति माळ बुळाईन, कि मळसा अन पार उक ईद पृथ्वी मा पाप माफ माळोद भी अधिकार आद.” ¹¹यीशु आ लकवा अन्द रोगी से अंदुन, “ना नीन से अनेतीन, येळ, तान व्हर्स नेगु अदकि तान मान्नी होदोग.”

12 बाक आव येददुन अदकि तुरन्त तांद व्हूरस नेगुकु सप्पा मुंदुर मुंद टु होटकु ओळ्दुन, इदुर मा सप्पा लॉकुर सट्ट आदुर, अदकि परमेश्वर उन बळाई माळकु अनली कुरतुर, “नाव रा हगि यागलु नोळीदील!”

यीशु लेवी इक कारदुन

(मत्ती ९:९-१३; लूका ५:२७-३२)

13 यीशु बाक अल टु होटकु क्यार्रा अन्द कनिरा मा होदुन, अदकि सप्पा भीळ आऊन हात्ती बत्त, अदकि आव आंदरी उपदेश कोळली कुरतुन. 14 अल टु होगावती यीशु हलफई नव पार लेवी इक कर ताकोमोद चौकी मा कुरतकु नोळदुन, अदकि यीशु आऊन से अंदुन, “नान हदि आगोग.” अदकि आव यदकु आऊन हदि आगोदुन.

15 बाक हगि आत कियोग यीशु तान चेलागोळ सांगुळ आऊन मान्या ऊमली कुरतुन, आग हापाळ मुंदुर कर ताकोमावाळेर अदकि पापी लॉकुर, यीशु अदकि आऊन चेलागोळ सांगुळ ऊमली कुरतुर; यतकी आंदुर हापाळ मुंदुर ईरोर, अदकि आऊन हदि आगोगीदुर. 16 नयिम इनोर गुरुगोळ अदकि फरीसीगोळ ईद नोळदुर क्क आव रा पापीगोळ अदकि कर ताकोमावाळेर सांगुळ ऊमेत्थान, रा आऊन चेलागोळी अंदुर, “आव रा कर ताकोमावाळेर अदकि पापीगोळ सांगुळ तनितान-कुडुतान?”

17 ईद केळकु यीशु आंदुर से अंदुन, “भला चंगा मंळसागोळी वैद्यगोळ्द जरवत हैलेच, लेकीन बमिर मंळसागोळी आदः ना न्यायीगोळी ईला, लेकीन पापी लॉकुरी कारूली बंदीन.”

उपास इन प्रश्न

(मत्ती ९:१४-१७; लूका ५:३३-३९)

18 बपतस्मा कोळावाळा यूहन्ना अन्द चेलागोळ, अदकि फरीसी लॉकुर चेलागोळ उपास माळतोगोर. अदकि थ्वाळासा लॉकुर बंदकु यीशु से अनली कुरतुर, “यूहन्ना अन्द चेलागोळ

अदकि फरीसी नोर चेलागोळ येती उपास ईटतार? लेकीन नीन चेलागोळ येती उपास ईटालुर?”

19 यीशु आंदुर से अंदुन, “येन नीव उम्मीद माळतीर कि ऊंद मदा दा वरातीगोळ बनिा ऊंडुर तदिर देल होदार? बलिकुल ईला! यागासताका मंळगार आंदुर सांगुळ आन, आगासताका आंदुर उपासा होग सकालुर. 20 लेकीन अव दनि बंदव याग मंळगार उक आंदुर से अलग माळकु आदीत; अदकि आ दनि आंदुर उपास माळयार.”

21 “क्वारा कपळा अन्द थगिर * हाळोद कपळा मा यारू हचालुर. ईलारा अद थगिर अदुर दा टु येनारा जेडु कोंडीत, आग व्हाशोद, हाळोद से, अदकि अद पयले से यक्कुल हरदोदति.” 22 व्हाशोद अंगुर इन रास्सा अक हाळोद तोगुल इन चलिा † दा यारू ईटालुर, ईलारा अंगुर इन रास्सा तोगुल इन चलिा अक हर्द बुट्टीत, अदकि अंगुर इन रास्सा अदकि तोगुल इन चलिा येदुदु नाश आगेदव, “लेकीन व्हाशोद अंगुर इन रास्सा व्हाशोद तोगुल इन चलिा दा तुमकु आगतद.”

आराम दनि इन प्रश्न

(मत्ती १२:१-८; लूका ६:१-५)

23 अदकि हागि आत कि यीशु आराम इन दशिी केई दी टु आगतेला होगोन; अदकि आऊन चेलागोळ नळुतेला गोदी नव लॉम्बागोळी मूरू कुरतुर. 24 आग फरीसीगोळ आऊन से अंदुर, “नोळ, इंदुर आराम इन दनि दा अद क्याल्सा येती माळतार जो नयिम इन अनुसार माळोद उचति हैलेच?”

25 यीशु आंदरी उत्तर कोट्टुन, येन नीव ईद यागलु वाचुसीदील, कि याग दाऊद उक जरवत ईरोद, याग आव अदकि आऊन संगीगोळ हस्तकु ईरोर, आग आव येन माळीदुन? 26 “आव ह्यांग अबयितार महायाजक उन समय दा, परमेश्वर

* 2:21 २:२१ व्हाशोद कपळा अन्द चट्टी थगिर † 2:22 २:२२ तोगुल इन चलिा दा नीर

उन भवन दा होगकु भेंट इन रोट्टीगोळी तदिन, यदुर्द तनिोद याजकगोळी बटिकु अदकि यारीकु भी उचति हैलेच, अदकि तान संगीगोळी भी कोट्टुन?”

27 आग यीशु आंदुर से अंदुन, “आराम इन दनि मंळसागोळ्द साठी माळकु आग्याद, ना कि मंळसा आराम दनि इन साटी.

28 इदुरसाटी मंळसा अन पार आराम दनि इन भी स्वामी आन.”

3

यीशु वंळगींद कयवाळा मंळसा अक चंगा माळदुन
(मत्ती १२:९-१४; लूका ६:६-११)

1 अदकि यीशु बाक यहूदी लॉकुरद सभागृह दा होदुन; अदकि अल ऊंद मंळसा ईरोन यार्द कय वंळगोगीत, 2 अदकि आंदुर यीशु मा दोष हचोर साटी आऊन ताक मा हतकु ईरोर कनिोळाता, आव आराम दनि दा आऊक चंगा माळतान का ईला. 3 यीशु वंळगींद कयवाळा मंळसा से अंदुन, “येळ, लॉकुर न्याड्या दा नीदरेग.”

4 अदकि यीशु आंदुर से अंदुन, “येन आराम इन दनि दा नयिम इन अनुसार भलाई माळोद उचति आद या बुरा माळोद? जीव इक उळसोद उचति आद या कोननोद?” लेकीन आंदुर सुंगा ईत्तुर. 5 बाक यीशु आंदुर मन इन कठोरता देल उदास आगकु, आंदरी सटिट देल नाकु दी नोळदुन, अदकि आ मंळसा से अंदुन, “तान कय मुंद वाळुस.” आव वाळुसदुन, अदकि आऊंद कय पयले अन्द घाई वळ्लीद आगेत. 6 आग फरीसीगोळ यहूदी लॉकुरद सभागृह दा टु व्हार्या होगकु तुरन्त हेरोदयिों लॉकुर सांगुळ यीशु उन वरिध दा साठगाठ माळली कुरतुर कि आऊक याता प्रकार देल नाश माळेव.

यीशु उन हदि भीळ इन नळोद

7 बाक यीशु तान चेलागोळ सांगुळ क्यार्रा दी होटोदुन. अदकि गलील दा टु ऊंद धोळ्द भीळ आऊन हदि नळुली

कुर्त, 8 अदकि यहूदयिया, अदकि यरूशलेम, अदकि इदूमयिया, अदकि यरदन गांगा अन आप्पाटी, अदकि सूर अदकि सैदा अनन्द आसपास टु ऊंद धोळ्द भीळ ईद केळकु आऊन हात्ती बंदुर कर्, आव ह्यांग अचम्भा अनन्द क्याल्सा माळतान. 9 ✨अदकि बाक यीशु तान चेलागोळ से अंदुन, “भीळ इन कारण ऊंद स्यांळ्दतुसा इवांगा नान साटी तयार ईरूल ताकी आंदुर नानी वत्त ईला सकुल.” 10 यतकी आव हापाळ मुंदरी चंगा माळीदुन; इदुरसाटी अल यास लॉकुर रोग देल बमिर ईरोर, आऊक मुट्टोर साटी आऊन मा बळिली आगोर. 11 अदकि दुष्टआत्मागोळ देल ग्रसत् लॉकुर भी, याग आऊक नोळतोगोर, अरा आऊन मुंद बळितोगोर, अदकि चळिलासकु अनतोगोर कर् “नी परमेश्वर उन पार हुय.”

12 यीशु दुष्टआत्मागोळी आदेश कोट्टुन कर् आव यारीकु भी ईद हेळतीदील कर् आव याव हुन.

हन्नेळ चेलागोळी नविळुसोद

(मत्ती १०:१-४; लूका ६:१२-१६)

13 बाक यीशु पहाळ मा येरेदुन अदकि यारी आव चाहासोन, आंदरी तान हात्ती कारदुन. अदकि आंदुर आऊन हात्ती बंदुर. 14 आग यीशु आंदुर दा टु हन्नेळ मंळसागोळ्द नविळ माळदुन, यारी आव प्रेरतिगोळ हेसुर कोट्टुन. अदकि अंदुन, “कनि ना नीमी तान सांगुळ ईटोरसाटी नीवळुसदीन, ‘ना नीमी प्रचार माळली व्हार्या कळाईन, 15 अदकि नीम हात्ती दुष्टआत्मागोळी तेगोद अधिकार ईत्तीत.’”

16 ई प्रकार देल आव हन्नेळ चेलागोळ्द नविळ माळदुन. शमौन यार्द हेसुर आव पतरस ईटदुन, 17 अदकि जब्दी इन पार याकूब, अदकि याकूब उन वार्ट यूहनना, यार्द हेसुर आव बुअनरगसि मतलब “गर्जन उन पार” ईटदुन, 18 अदकि

✨ 3:9 ३:९ मरकुस ४:१; लूका ५:१-३

अन्दरियास, फलिपिपुस, बरतुलमै, मत्ती, थोमा, हलफई इन पार याकूब, तद्दै अदकि शमौन कनानी जो रोमन सरकार उन खलिाप ईरोन. 19 अदकि यहूदा इस्करियोती, जो यीशु उक ध्वाका देल हुळसुसीदुन.

यीशु अदकि बालजबूल

(मत्ती १२:२२-३२; लूका ११:१४-२३; १२:१०)

20 बाक यीशु अदकि आऊन चेलागोळ मान्नी बंदुर; अदकि हगि भीळ जमा आगेत, क्कि आंदुर रोट्टी भी तनि सकदिल 21 याग आऊन मान्यागोळोर लॉकुर ईद केळदुर, रा आंदुर आऊक हुडोर साटी होट्टुर, यतकी आंदुर अनतोगोर, क्कि आऊन मन ठकान मा हलैच.

22 ✧ अदकि शास्त्री भी जो यरूशलेम टु बंदीदुर, ईद अनतोगोर, क्कि “आऊन दा बालजबूल* शैतान समुस्कु आन, अदकि ईद भी, क्कि आव दुष्टआत्मागोळव सरदार उन मदत देल दुष्टआत्मागोळी तेगुतान.”

23 इदुरसाटी यीशु आंदरी हात्ती कारूक, आंदुर से उदाहरण दा अनली कुरतुन, “शैतान ह्यांग शैतान उक तेगु सकतान?”

24 अदकि अगर यातोदारा राज्य दा फूट बळ्ळिल, रा अद राज्य ह्यांग संची ईर सकतद? 25 अदकि अगर यातोदारा मान्ना दा फूट बळ्ळिल, रा अद मान्ना ह्यांग संची ईर सककीत?

26 इदुरसाटी अगर शैतान तान अच राज्य अन्द वरिधी आगकु तान दा फूट केडुल, रा आव तान राज्य अक ह्यांग सुरक्षति ईट सकतान? आऊंद रा अन्त अच आगेदीत.

27 लेकीन यावारा मळसा यातोवारा ताकतवर मळसा अन्द मान्या होक्कु आऊंद माल हगि अच कदू सकालुन, पयले आव आ ताकतवर मळसा अक कट्यान; अदकि आग आ मळसा आ

✧ 3:22 ३:२२ मत्ती १:३४; १०:२५

* 3:22 ३:२२ बालजबूल-दुष्टआत्मागोळव सरदार

ताकतवर मंळसा अनन्द मान्ना अनन्द बुळ्क ईड्ड सामान इक कदू सकतान.

28 ना नीम से खरा माताळतीन, कमिंळसागोळ्द औलाद ईनव सप्पा पाप अदकि अपमान जो आंदुर माळतार, माफ माळकु आदव. 29 ✨लेकीन जो यावारा पवतिर आत्मा अनन्द खलिाप अपमान माळतान, आऊक यागलु माफ माळकु आगतीदील, “यतकी आव अनन्त पाप इन अपराधी आन.” 30 यीशु आ लाँकुरी इदुरसाटी ईव सब मातगोळ अंदुन “यतकी लाँकुर अनतोगोर, की आऊन दा दुष्टआत्मा आद.”

यीशु नोर मोय आकतींग अदकि वार्ट

(मत्ती १२:४६-५०; लूका ८:१९-२१)

31 अदकि यीशु उन मोय आकतींग अदकि वार्ट बंदुर अदकि व्हार्या नीदुरकु यीशु उक कारूली कळुदुर. 32 अदकि भीळ यीशु उन आसपास कुर्तकु ईरोद, अदकि आंदुर आऊन से अंदुर, “नोळ, नीन मोय नीन वार्ट अदकि आकतींग व्हार्या नीनी कारेत्यार.”

33 यीशु आंदरी उत्तर कोट्टुन, की “नान मोय नान वार्ट अदकि नान आकतींग याक हुळ?” 34 अदकि आव तान आसपास कुर्तकु ईरोर आ लाँकुरी नोळदुन अदकि अंदुन, “नोळी! नान मोय, आकतींग अदकि वार्टुर इंदुरा उर. 35 यतकी जो यावारा भी परमेश्वर उन इच्छा मा नळदान, आवा नान वार्ट, आकतींग, अदकि मोय हुळ.”

4

बीजा बोऊसावाळा अनन्द उदाहरण

(मत्ती १३:१-९; लूका ८:४-८)

1 ✨यीशु बाक झील इन कनिरा मा उपदेश कोळली कुरतुन: अदकि हगि धोळ्द भीळ आऊन हात्ती जमा आगेत की आव

झील इन ऊंद ड्वांगा मा येरकु कुरतोदुन अदकि सप्पा भीळ भूमी मा झील इन कनिरा मा नीदुरकु ईत्त. ² अदकि यीशु आंदरी उदाहरणगोळ दा हापाळ सा मात कल्सली कुरतुन, अदकि तान उपदेश दा आंदुर से अंदुन.

³ “केळी! ऊंद घन ऊंद मंळसा ईरोन जो बीजा बोऊसोर साठी होतीदुन. ⁴ अदकि आव केई दा बीजा भट्टिन आटोटी येनारा बीजा हादी मा बदिदव, अदकि पक्षीगोळ बंदकु अवरी तनि कोंडोव. ⁵ अदकि येनारा बीजा कल्ल इन जागा मा बदिदव यल अदरी यक्कुल मुण्ण सकदिल. अदकि गहरा मुण्ण ईला सकिदुर देल अव राटनेरी अंकुर हुळदव. ⁶ बाक याग सुर्य होळ्त; रा स्याणेव मार्रगोळी होताक बुळ्त; यतकी जळीगोळ जादा गयरा ईला आगीदव, अदकि मार्रगोळ जल्दी अच वंळ्गेदव. ⁷ अदकि थ्वाळासा बीजा मुळ्ल इन झुनकुळ दा बदिदव, अदकि धोड्डेव आगकु बेळुकु बीजा अक वत्त बुट्टव अदकि आ बीजागोळी काय हत सकदिल. ⁸ लेकीन थ्वाळासा बीजा वळ्लीद जागा मा बदिदव, अदकि अव बेळदव अदकि बेळुकु अनाज पैदा माळदव; यातोवारा तीस गुणा, यातोवारा साठ गुणा अदकि यातोवारा सौ गुणा फसल तंदव.”

⁹ आग यीशु अंदुन, “यार हात्ती केळोर साटी कवि आव, आव केळ कोमुल.”

उदाहरणगोळ्द कारण

(मत्ती १३:१०-१७; लूका ८:१,१०)

¹⁰ याग यीशु आबना ईरोन, रा याता लॉकुर आऊन उदाहरण केळीदुर, आंदुर दा टु येनारा लॉकुर हन्नेळ चेलागोळ सांगुळ आऊन हात्ती बंदुर अदकि आऊक उदाहरण इन मतलब येन आद. ¹¹ यीशु आंदुर से अंदुन, नीमी परमेश्वर उन राज्य अनूद भेदगोळ्द समझ कोटकु आग्याद, लेकीन व्हार्या नोर लॉकुर साटी, सप्पा मातगोळ उदाहरणगोळ दा अंदकु आग्याद:

12 यतकी आंदुर नोळुल अदकि
 नोळतेला अच ईरूल, लेकीन आंदरी येनु सम्सबाळुल,
 केळुल अदकि केळतेला अच ईरूल
 लेकीन येनु सम्सबाळुल.

हगि आगबाळुल कि आंदुर मन परमेश्वर उन दी तरिगुल
 अदकि आंदरी माफ माळकु आगुल.

बीजा बोऊसावाळा उदाहरण इन व्याख्या
 (मत्ती १३:१८-२३; लूका ८:११-१५)

13 बाक यीशु आंदुर से अंदुन, येन नीव ईद उदाहरण
 समसालीर? रा बाक दुसरा यातोदारा उदाहरणगोळी ह्यांग
 समसीर? 14 केईवाळा जो बोऊसतान, अद परमेश्वर उन वचन
 हुन. 15 येनारा लॉकुर हादी माकळोर बदिक्ु बीजा अन्द घाई
 आर जो परमेश्वर उन वचनगोळी केळतार. रा शैतान तुरन्त
 बंदकु वचन रूपी बीजा जो आंदुरदा बोऊसकु आग्याद नेगुकु
 वोयतान. 16 दुसरा लॉकुर बीजागोळ घाई ईरतार जो कलवाळा
 जागा मा बीळताव. ह्यांग आंदुर बातणी केळतार, आंदुर इदरी
 खुशी देल ग्रहण माळ कोमतार. 17 लेकीन तान बुळ्क जळ
 ईला ईटदुर कारण आंदुर थ्वाळासा अच दनिगोळ साटी ईरतार;
 इदुरद बाददा याग वचन इन कारण आंदुर मा क्लेश या उपद्रव
 आगताव, रा आंदुर तुरन्त ठोकर तनितार. 18 दुसरा लॉकुर
 मुळ्ळवाला झुनकुळ दा बोऊसकु बीजा अन घाई आर. इंदुर वचन
 केळावाळेर उर. 19 अदकि दुनया अन चनिता, धन इन ध्वाका,
 अदकि च्याच वस्तुगोळ्द लोभ आंदुरदा तुमकु वचनगोळी वत्त
 बुळतद. अदकि अद नषिफल ईतोगतार. 20 लेकीन यारारा लॉकुर
 वळ्ळीद जागा अन्द घाई आर, जो वचन केळकु ग्रहण माळतार
 अदकि वळ्ळीद फसल तरतार, यारारा तीस गुणा, यारारा साठ
 गुणा, अदकि यारारा सौ गुणा.

दगिया अनूद उदाहरण (लूका ८:१६-१८)

21 ✨अदकि यीशु आंदुर से अंदुन; येन दगिया अक इदुरदा साटी तरतार कि बर्तन या व्हर्स इन ल्यालमा ईटुल? येन अदरी दीवट* मा ईट सकालुर? 22 ✨जो येनारा भी होचकु आद अदरी व्हार्या तनकु आदीत, अदकि जो येनारा भी कवर माळकु आग्याद, अदरी उजागर माळकु आदीत. 23 अगर यारोवारा केळव कवि आव, रा आव केळ कोमुल.

24 ✨बाक यीशु आंदुर से अंदुन, “जो नीव केळतीर अदुर मा ध्यान कोळी. याता नाप देल नीव दुसरा अक आळुतीर अदा नयिम देल नीमी भी आळुकु आदीत, अदकि नीम साटी अदुरदा यक्कुल जोळसकु आदीत. 25 ✨यतकी यार हात्ती आद, आऊक मात्त यक्कुल कोटकु आदीत; अदकि यार हात्ती हैलेच, आऊन से अद भी जो आऊन हात्ती आद, ताकोमकु आदीत.”

कोम होळोद बीजा अनूद उदाहरण

26 बाक यीशु अंदुन, “परमेश्वर उन राज्य हगि आद, जसा यावारा मंळसा तान केई इन भूमी दा बीजा भळितान, 27 अदकि आव इळलकी मगिदुन अदकि व्हातर्या येदुन अदकि अद बीजा अंकुरीत आगकु हगि बेळुत, कि आव अरू सकदिल कि ईद हयांग आत. 28 पृथ्वी तान ताना अनाज तरतद. पयले अंकुर, बाक लॉम्बा, अदकि आग अदुर बाद्दा लॉम्बा दा तयार बीजा. 29 लेकीन याग बीजा हण्ण आगेगतद, आग आव केईवाळा तुरन्त कुळगुल देल कडुली हततान, यतकी फसल इन कटाई होट्ट बंदाद.”

✨ 4:21 ४:२१ मत्ती ५:१५; लूका ११:३३ * 4:21 ४:२१ दगिया ईटोद जागा
 ✨ 4:22 ४:२२ मत्ती १०:२६; लूका १२:२ ✨ 4:24 ४:२४ मत्ती ७:२; लूका ६:३८ ✨ 4:25 ४:२५ मत्ती १३:१२; २५:२९; लूका १९:२६

राई इन दाना अन्द उदाहरण

(मत्ती १३:३१-३२,३४; लूका १३:१८-१९)

30 बाक यीशु केळदुन, “नाव परमेश्वर उन राज्ज ह्यांग आद इदुर उपमा यार देल कोट्टेव. अदकि याता उदाहरण देल आऊन वर्णन माळेव? 31 आव राई इन दाना अन्द घाई आन याग पृथ्वी मा बोऊसकु आगतद रा पृथ्वी इन सप्पा बीजागोळ से स्यांळ्द ईरतद. 32 लेकीन याग बीजा बेळदोगतद, रा बेळुकु सप्पा मारगोळ से धोळ्द आगेगतद, अदकि अदुर्द हगि धोळ्द डगालगोळ होळताव यल आकाश इन पक्षी अदुर्द सावली दा ग्वादा माळकु ईरताव.”

33 यीशु आंदरी ईत्ता प्रकार ईनव हापाळ सा उदाहरण कोट-कोटकु आंदुर्द समझ इन अनुसार यक्कुल से यक्कुल समझ दा बरूल ई प्रकार देल वचन केळसतोगोन, 34 अदकि बनिा उदाहरण अंदकु यीशु लॉकुरी येनु ईला कलसतोगोन. लेकीन आबना दा आव तान नजि चलागोळी सप्पा मातगोळ्द मतलब हेळतोगोन.

यीशु आँधी इक शांत माळदुन

(मत्ती ८:२३-२७; लूका ८:२२-२५)

35 अदा दशी द्यावगा अक, यीशु तान चेलागोळ से अंदुन, “बरी, नाव झील इन आप्पाटी होगाता.” 36 आंदुर भीळ इक बट्टुर, याता ड्वांगा दा यीशु ईरोन अदा ड्वांगा मा चेलागोळ भी बंदुर अदकि यीशु उक तान सांगुळ झील इन आप्पाटी ओतुर; अदकि अल आऊन सांगुळ, मात हापाळ सा ड्वांगा भी ईरव. 37 अचानक आग ऊंद भयानक आँधी बत्त, अदकि लयरगोळ ड्वांगा देल टकरूसली हत्त ईल ताका कनिीर ड्वांगा दा तुमली हत्त. 38 अदकि यीशु ड्वांगा अन्द हदिळोद भाग दा ऊसी मा ताल्ला ईटकु मगिोन. अदकि आंदुर आऊक येवसदुर अदकि अंदुर, “हे गुरु, येन नीनी चन्ता हैलेच कनिाव मुळ्केतेव?”

39 आग यीशु यदकु आँधी अक दनकुसदुन, अदकि लयरगोळ से अंदुन, “शांत आगोग, थामसेग!” अदकि आँधी थामसेत अदकि नाकु दी हापाळ सननाटा आगेत. 40 अदकि यीशु तान चेलागोळ से अंदुन, “नीव येती अंजेतीर? येन नीमी ईगासताका वशिवास हैलेच?”

41 अदकि चेलागोळ हापाळ अंजेदुर अदकि आपस दा अनली कुरतुर, “ईव मंळसा याव हुन ईल ताका क्कि आँधी अदकि लयरगोळ भी ईऊन आग्या मानसताव?”

5

दुष्टआत्मा हतकु मंळसा अक चंगा माळोद
(मत्ती ८:२८-३४; लूका ८:२६-३९)

1 यीशु अदकि आऊन चेलागोळ झील इन आप्पाटी गरिसेनयागोळ्द प्रदेश दा पोहचुसदुर. 2 याग यीशु इवांगा मा टु ईळदुन रा तुरन्त ऊंद मंळसा जो क्कि यारदा दुष्टआत्मा हतकु ईरोद, कब्रस्तान दा टु होटकु यीशु से मलिसदुन. 3 आव कब्रस्तान दा ईरतोगोन अदकि याऊ आऊक शंकलीगोळ देल भी कटकु ईला ईट सकोन, 4 यतकी आऊक बेळीगोळ अदकि शंकलीगोळ देल कटकु आगीत, लेकीन आव हापाळ अनली शंकलीगोळी मुरद बुटीदुन अदकि बेळीगोळ्द तुकळा-तुकळा माळ कोंडीदुन, अदकि यारू आऊक बस दा ईला माळसकोर. 5 आव लगातार ईळ्लक-हागुल कब्रस्तान अदकि पहाळीगोळ दा वयाळोन अदकि कीटुरतोगोन, अदकि तान तान इक कलगोळ देल घायल माळतोगोन.

6 आव यीशु उक दुर टु उच नोळदुन, अदकि आव ओळतेला यीशु उन हात्ती बंदुन अदकि ट्वांगरा अन्द भार देल बदिक्कू प्रणाम माळदुन. 7 अदकि आव धोळ आवाज देल चळिलासकु अंदुन, “हे यीशु, महान परमेश्वर उन पारा, नानी नीन से येन क्याल्सा? ना नीनी परमेश्वर उन करिया कोळतीन, क्कि नी नानी

दुख कोळबाळ.” 8 आव यीशु से इदुरसाटी हगि अंदुन यतकी यीशु आऊन से अंददिन, “हे दुष्टआत्मा, ई मंळसा अन्द मय दा टु होटबुळ!”

9 यीशु आ दुष्टआत्मा से केळदुन, “नीन येन हेसुर आद?”

अद यीशु से अन्त, “नान हेसुर सेना आद; यतकी नाव हापाळ सा आयेव.” 10 अदकि दुष्टआत्मा यीशु से च्याच वनिती माळकु अन्त, कनिामी ई प्रदेश टु व्हार्या कळुबाळ.

11 हात्तीगोळ्द पहाळ इन ढलान मा हंदीगोळ्द ऊंद धोळ्द झुण्ड आळोद. 12 दुष्टआत्मागोळ यीशु से वनिती माळकु अंदव, “नामी आ हंदीगोळ्द झुण्ड दा कळुबुळ कनि नाव आंदुर बुळ्क होक्केव.” 13 इदुरसाटी यीशु आंदरी आग्या कोटुन अदकि दुष्टआत्मा आ मंळसा दा टु होटकु हंदीगोळ्द बुळ्क होकदव अदकि झुण्ड, जो लगभग येढढ हजार इन ईरोद, ढलान मा टु घसरूसकु झील दा होगकु बत्तित. अदकि अल्या मुळ्ककु सोत्तव.

14 हंदीगोळी आळसावाळेर ओळकु नगर अदकि ऊरगोळ दा ईद खबर केळ्सदुर, अदकि जो आगीत, लॉकुर अदरी नोळली बंदुर. 15 यीशु उन हात्ती लॉकुर बंदकु, आ मंळसा अक नोळदुर यारदा दुष्टआत्मागोळ ईरव, मतलब सेना समुस्कु ईरोद, कपळा हाक्कु अदकि गुमसुम कुरत नोळकु अंजेदुर. 16 या लॉकुर ईद घटना अक पयले नोळीदुर रा हेळदुर कनि नोळावाळेर आऊन, यारदा दुष्टआत्मागोळ ईरव, अदकि हंदीगोळ्द पुरा हाल आंदरी अंदकु हेळदुर.

17 आग लॉकुर यीशु से वनिती माळकु अनली कुरतुर कनि नाम प्रदेश दा टु होटोग.

18 अदकि याग यीशु इवांगा मा येरली कुरतुन रा आव यारदा पयले दुष्टआत्मागोळ ईरव, यीशु से वनिती माळली कुरतुन, “नानी तान सांगुळ ईरगोळ.”

19 लेकीन यीशु आऊक आग्या कोटीदील, अदकि आऊन से अंदुन, “तान मान्या होगकु तान परविर इक हेळ कनिनीन मा दया माळकु प्रभु नीन साटी ह्यांग धोड्डेव क्याल्सा माळ्यान.”

20 बाक आव होगकु दकिपुलसि* दा ई मातगोळी हेळली कुरतुन कनि यीशु नान साटी ह्यांग धोड्डेव क्याल्सा माळ्यान; अदकि सप्पा लांकुर ईद केळकु चकति आदुर.

सोत्त पोर अदकि ऊंद रोगी आर्त
(मत्ती ९:१८-२६; लूका ८:४०-५६)

21 याग यीशु बाक इवांगा देल झील इन आप्पाटी होदुन, रा ऊंद धोळ्द भीळ आऊन हात्ती बंदकु जमा आगेत. आव झील इन कनिरा मा का ईरोन. 22 याईर हेसुर ईनव ऊंद यहूदी मंळसा, जो यहूदी लांकुरद सभागृह अन्द सरदारगोळ दा टु ऊंद सरदार बंदुन, अदकि यीशु उक नोळकु आऊन कालगोळ मा बदिदुन, 23 अदकि ईद अंदकु यीशु से हापाळ वनिती माळदुन, “नान स्याण पोर सायापरी आगेग्यार: नी बंदकु आकनि मा कय ईट क आक वळलीद आगकु जत्तिता ईरूल.”

24 आग यीशु आऊन सांगुळ नळदुन अदकि ऊंद धोळ्द भीळ आऊन हदि आगेत, ईल ताका कनि लांकुर आऊन मा बळिली आगेर.

25 अल्या ऊंद आर्त ईरोर, आक इक हन्नेळ वर्ष टु खुन होगोद रोग ईरोद. 26 आ आर्त हापाळ परेशान ईरोर आक हापाळ वैद्यगोळ से तान ईलाज माळीदुर तरी भी यक्कुल दुखी आगेगीदुर. अदकि तान सप्पा धन लुट्सदुर बाददा भी आकी येनु आराम सकिदिील, लेकीन मात यक्कुल रोगी आगेगीदुर. 27 आक यीशु उन बारा दा चर्चा केळीदुर, अनकु “भीळ दा हदि टु बंदकु आऊन कपळा अन्द कनिरा अक मुटदुर.” 28 यतकी आक मन

* 5:20 ५:२० हत्त नगरगोळ्द धोळ्द शयर

मन दा अच अनतोगोर, “अगर ना आऊन कपळा अक मुटाईन, रा वळ्लीद आगेगाईन.”

29 आग आक यीशु उन कपळा अक मुटदुर अदकि तुरन्त आकनि खुन होगोद बंद आगेत, अदकि आ आर्त तान शरीर दा ईद जान्स कौंडुर कनि तान आ बमिरी देल वळ्लेर आगेदीन.

30 यीशु तुरन्त तान मन दा जान्स कौंडुन कनि नान दा टु ईद सामर्थ्य होताद. अदकि आव भीळ दा हदि तरिगकु केळदुन, “नान कपळा अक यार मुटदुर?”

31 आग आऊन चेलागोळ आऊक अंदुर, नी नोळत्या कभिळ नीन मा बळिली इक आगतद, अदकि नी अनत्या कियार नानी मुटदुर?

32 लेकीन यीशु आक इक नोळोर साठी नाकु दी कण्ण नेगुकु नोळदुन, कियार नानी मुटदुर. 33 आग आ आर्त जो आकनि सांगुळ आगीत आक ईद जान्सकु कनि नान ह्यांग भलाई आग्याद, अंज्त अदकि नळ्गतेला बंदुर, अदकि आऊन कालगोळ मुंद ट्वांगरा टेक्सकु आऊक सब हाल खरा-खरा हेळ बुटुर. 34 यीशु आकनि से अंदुन, “हे पोरी, नीन वशिवास नीनी वळ्लीद माळ्याद: खुशी देल होग, अदकि तान ईद बमिरी देल ऊळदकु ईर.”

35 यीशु ईद अनतेला अच ईरोन कियहूदी लॉकुरद सभागृह अनूद सरदार उन मान्या टु थ्वाळासा लॉकुर बंदकु अंदुर, “नीन पोर रा सोतोग्यार, ईग गुरु उक येतरी दुख कोळत्या?”

36 लेकीन जो मात आंदुर अनोर, अदरी यीशु केळदुन पर ध्यान कोटीदील, यहूदी लॉकुरद सभागृह अनूद सरदार से अंदुन, “अंजबाळ, सर्फि वशिवास ईट.” 37 अदकि यीशु पतरस अदकि याकूब अदकि आऊन वार्ट यूहन्ना अक बटिकु, दुसरा यारीकु तान सांगुळ बर गोटीदील. 38 याग आंदुर सप्पा मुंदुर यहूदी लॉकुरद सभागृह अनूद सरदार उन मान्या बंदुर, रा यीशु नोळदुन किय अल खलबली मचुसकु आद. अदकि लॉकुरी हापाळ वरलतेला

अदकि चलिळासतेला नोळदुन. 39 आग यीशु मान्या अनूद बुळ्क होक्कु आंदुर से अंदुन, “नीव येतरी खलबली मचुसतीर अदकि वर्लेतीर? पोर सायलकि आर, लेकीन मगित्यार.”

40 आंदुर यीशु उन मज्याक हारसली कुरतुर, लेकीन आव सप्पा मुंदरी तेगुक्कु पोर इन मोय-आप्प अदकि तान मुर चेलागोळ सांगुळ बुळ्क यल पोर बदिक्कु ईरोर, अल होदुर. 41 अदकि आव पोर इन कय हुळ्क आकनि से अंदुन, “तलीता कुमी!” यदुरद मतलब आद, “हे पोरी, ना नीन से अनतीन, येळ.”

42 अदकि आ स्याण पोर तुरन्त यदकु नळुली अदकि वयाळली कुरतुर; यतकी आक हन्नेळ वर्ष इनोर ईरोर. इदुर मा लॉकुर हापाळ सट्ट आगेदुर. 43 बाक यीशु आंदरी चेतावनी कोटकु आग्या कोटुन की ईद मात यारू जान्स ईला पायजे, अदकि आव अंदुन “पोर इक येनारा तनिली कोळी.”

6

नासरत ऊर दा यीशु उन अनादर

(मत्ती १३:५३-५८; लूका ४:१६-३०)

1 अल टु होटकु यीशु तान प्रदेश दा बंदुन; अदकि आऊन चेलागोळ भी आऊन हदि बंदुर. 2 आराम इन दशी आव यहूदी लॉकुरद सभागृह दा उपदेश कोळली होदुन, अल हापाळ सा लॉकुर ईरोर, याग लॉकुर आऊन मातगोळ केळदुर, रा आंदुर सट्ट आगेदुर अदकि अनली कुरतुर, “ईऊक ईव मातगोळ यल टु होटबंदव? अदकि ईद याता ग्यान हुन जो ईऊक कोटकु आग्याद? आव चमत्कार ह्यांग माळतान? 3 येन ईव व्हर्स हुळ्ली माळावाळा अन पार आलच, जो मरयिम उन पार, अदकि याकूब, योसेस, यहूदा, अदकि शमौन उन वार्ट हुन? येन आऊन आकतीगेर ईल नाम न्याड्या दा ईरालुर?” इदुरसाटी लॉकुर आऊंद इनकार माळ बुटुर.

4 *यीशु आंदुर से अंदुन, “भवषियवक्ता अन्द तान नगर, तान परवार, अदकि तान मान्या मान सम्मान आगाल लेकीन दुसरा लॉकुर आंदुरद मान सम्मान माळतार.”

5 अदकि यीशु अल येनु सामर्थ्य इन क्यौलसा माळीदील, सरिफ थ्वाळासा बमिर लॉकुर मा कय ईटकू आंदरी चंगा माळदुन.

यीशु हन्नेळ चेलागोळी प्रचार माळली कळुदुन
(मत्ती १०:५-१५; लूका ९:१-६)

6 अदकि यीशु उक आंदुरद अवश्वास मा हापाळ आश्चर्य आत, अदकि आव नाकु दाकळव ऊरगोळ दा उपदेश कोळतेला वयाळदुन.

7 यीशु तान हन्नेळ चेलागोळी तान हात्ती कारदुन अदकि आंदरी दुष्टआत्मागोळी तेगोद अधकार कोट्टुन. अदकि येढ्ढ-येढ्ढ माळकु नगर दा कळुदुन 8 अदकि आंदरी आग्या कोट्टुन, “हादी इन साठी कोल इक बटिकु अदकि येनु हुडुबाळी; ना रा रोट्टी, ना झ्वारा, अदकि ना नीम खसिा दा पैस्या, 9 लेकीन केरू हाकी अदकि यातोदारा दुसरा कुळता ओयबाळी.” 10 अदकि यीशु चेलागोळ से अंदुन, “येल्यारा नीमद यारदारा मान्या स्वागत आत, रा यागासताका अल टु सार आगालीर आगासताका अदा मान्या दा रूक्सकु ईरी. 11 **अगर नीव ऊंद ईत्ता नगर दा होगतीर येल लॉकुर नीमद स्वागत माळालुर या नीम मातगोळी केळालुर, रा अदरी बटि बुळी अदकि तान कालगोळ्द धुळा झाल्स कोमी. ईद आंदुर साटी ऊंद चेतावनी आदीन.”

12 आग आंदुर अल टु होटोदुर. अदकि आंदुर होगकु प्रचार माळदुर, तान पापगोळी बळी अदकि परमेश्वर उन दी तरिगी. 13 *आंदुर हापाळ सा दुष्टआत्मागोळी तेगदुर, अदकि हापाळ

* 6:4 ६:४ यूहन्ना ४:४४ * 6:11 ६:११ प्रेरतिगोळ १३:५१ * 6:11 ६:११ लूका १०:४-११ * 6:13 ६:१३ याकूब ५:१४

सा बमिर मंळसागोळ मा जैतून इन याण्णा अन्द मालसि माळकु आंदरी चंगा माळदुर.

यूहन्ना बपतस्मा कोळावाळा अक कोन्नोद
(मत्ती १४:१-१२; लूका ९:७-९)

14 ✨हेरोदेस राजा भी यीशु उन चर्चा केळदुन, यतकी आऊन हेसुर हापाळ फैलुसेगति, अदकि येनारा लॉकुर अंदुर, “यूहन्ना बपतस्मा कोळावाळा सोत्तुर दा टु जत्तिता आग्यान, इदुरसाटी आऊन से इव सामर्थ्य ईनव क्याल्सा प्रगट आगताव.”

15 दुसरा लॉकुर अंदुर, “इव एलयियाह हुन.”

लेकीन यारारा दुसरा लॉकुर अंदुर, “इव भवषियवक्ता हुन, हाळोद जमाना अन भवषियवक्तागोळ घाई ऊंद.”

16 ईद केळकु हेरोदेस राजा अंदुन, “आव बपतस्मा कोळावाळा यूहन्ना हुन. यार्द ताल्ला ना कळसुसीदीन, आवा सोत्तुर दा टु जत्तिता आग्यान!” 17 ✨हेरोदेस राजा तान सपिईगोळी कळकु यूहन्ना अक हुळसुसदुन अदकि संकलीगोळ देल कटक जयल दा हाक बुटीदुन. ईद हेरोदय्यास इन कारण हेरोदेस हगि माळदुन, यतकी हेरोदेस तान वार्ट फलिपिपुस उन हगिस् हेरोदय्यास इन सांगुळ मदा माळ कोंडीदुन. 18 बपतस्मा कोळावाळा यूहन्ना घळी घळी हेरोदेस राजा से अनतेला ईत्तुन, “नीन साटी तान वार्ट उन हगिस् उन से मदा माळोद उचति हैलेच.”

19 इदुरसाटी हेरोदय्यास बपतस्मा कोळावाळा यूहन्ना से दुश्मनी ईटतोगोर अदकि ईद चाहासोर कि आऊक हयांगारा भी कोन्सुस बुळाईन; लेकीन हेरोदेस राजा अन्द कारण देल हगि माळ सकदील. 20 हेरोदेस यूहन्ना से अंजतोगोन. यतकी हेरोदेस जान्सतोगोन कि बपतस्मा कोळावाळा यूहन्ना ऊंद

✨ 6:14 ६:१४ मत्ती १६:१४; मरकुस ८:२८; लूका ९:१९ ✨ 6:17 ६:१७ लूका ३:१९,२०

न्यायी अदकि पवत्रि मंळसा आन, इदुरसाटी हेरोदेस आऊक ऊळसकु ईटतोगोन, अदकि यागल्यारा भी आव यूहन्ना अन्द मातगोळ केळतोगोन रा हापाळ अंजेगतोगोन, लेकीन खुशी देल आऊन मातगोळ भी केळतोगोन.

21 आखरी दा हेरोदय्यास इक हेरोदेस उन जनम दनि मा वळ्लीद मौका सकित. अदकि आंदुर पुरधानगोळी, सेनापतीगोळी, अदकि गलील इन धोळ धोळ लाँकुरी ऊमली कार्सदुर. 22 रा हेरोदय्यास इन पोर बुळ्क बंदुर, अदकि कुणुकु हेरोदेस उक अदकि आऊन सांगुळ जो कुरतकु पावनागोळ ईरोर आंदरी खुश माळदुर. रा राजा आ पोर इन से अंदुन, “नी जो चाहास्या अद नान से बेळ, ना नीनी कोळाईन.” 23 अदकि आव करिया तनिकु आकी वचन कोट्टुन, कनि नी जो भी नान से बेळ्या अद ना नीनी कोळाईन, ईल ताका कनिांद आरधा राज्य भी.

24 आग आ पोर व्हार्या होगकु तान मोय इन से केळदुर, “ना येन बेळाईन?” रा आक इन मोय हेरोदय्यास माताळदुर,

“यूहन्ना बपतस्मा कोळावाळा अन्द ताल्ला.”

25 आक तुरन्त राजा हेरोदेस उन हात्ती बुळ्क बंदुर अदकि आऊन से वनिती माळदुर, “ना चाहासतीन, कनि नी ईगल्या बपतस्मा कोळावाळा यूहन्ना अन्द ताल्ला ऊंद टाटी दा नानी कारसकु कोळ.”

26 इदुर देल हेरोदेस राजा हापाळ उदास आदुन, लेकीन आव तान सप्पा पाऊनागोळ्द मुंद वादा माळीदुन अदकि करिया तदीदुन. ई कारण देल आकी मना माळ सकदील. 27 इदुरसाटी राजा तुरन्त ऊंद सपिाही इक आग्या कोटकु कळुदुन कनि बपतस्मा कोळावाळा यूहन्ना अन ताल्ला कळकु तंदान, आग जल्लाद जेलखाना दा होगकु आऊन ताल्ला कळदुन. 28 अदकि ऊंद टाटी दा ईटकु तंदुन अदकि आ पोर इक कोट्टुन, अदकि पोर

तान मोय इक कोट्टुर. 29 ईद केळकु यूहन्ना नोर चेला बंदुर, अदकि आऊन लाश इक ओतुर अदकि कब्र दा ईट्टुर.

हन्नेळ प्रेरतिगोळ्द वापसी

(मत्ती १४:१३-२१; लूका ९:१०)

30 आग प्रेरतिगोळ्द वापस बंदुर अदकि यीशु से सकिदुर, अदकि जो भी आंदुर माळीदुर अदकि कलसीदुर, सब यीशु अक हेळदुर. 31 यीशु आंदुर से अंदुन, “नळी अदकि अलग येल्यारा सुनसान जागा दा नळुकु आराम माळी.” यतकी अल हापाळ लाँकुर होगोद-बरोद माळतोगोर, अदकि आंदरी ऊमोद मवका भी ईला सकितोगोद. 32 इदुरसाटी आंदुर ड्वांगा मा येरकु, सुनसान जागा दा अलग होटोदुर.

यीशु भीळ इक भोजन तनिसदुन

(मत्ती १४:१५-२१; लूका ९:११-१७; यूहन्ना ६:१-१४)

33 हापाळ मुंदुर आंदरी होग्त नोळदुर अदकि ऊंद घन दा अर्त कौडुर क् आंदुर यार उर; अदकि सप्पा लाँकुर नगरगोळ्द दा टु जमा आगकु अल पैदल हरदुर अदकि यीशु अदकि आऊन चेलागोळ्द से पयले होगकु पोहचुसदुर. 34 *याग यीशु ड्वांगा दा टु व्हार्या होट्टुन रा ऊंद धोळ्द भीळ नोळदुन, अदकि आऊक आंदुर मा दया होट्ट बत्त, यतकी आंदुर आ म्यांडागोळ्द घाई ईरोर, यार्द यारू रखवाला ईरालुर; इदुरसाटी यीशु आंदरी हापाळ सा मातगोळी कल्सली कुरतुन. 35 याग द्याव हापाळ मुळकेत, रा आऊन चेलागोळ्द आऊन हात्ती बंदकु अनली कुरतुर, “ईद सुनसान जागा आद, अदकि द्याव हापाळ मुळ्केग्याद. 36 लाँकुरी सार माळ क् नाकु दाकळव ऊरगोळ्द अदकि मोहल्ला दा होगकु, ताम साटी येनारा तनिली कौंड कोमुल.”

* 6:34 ६:३४ मत्ती ९:३६

37 लेकीन यीशु आंदरी उत्तर कोट्टुन, “नीवा आंदरी येनारा तनिली कोळी.”

चेलागोळ यीशु से अंदुर, “नाव येढढ सौ दीनार* इन रोट्टीगोळी कोंडेव, अदकि आंदरी तनिसेव?”

38 इदुरसाटी यीशु आंदुर से अंदुन, “होगकु नोळी नीम हात्ती यास रोट्टीगोळ आव?”

आंदुर मालूम माळकु अंदुर, “अईद रोट्टीगोळ अदकि येढढ मेन.”

39 आग यीशु तान चेलागोळी आग्या कोट्टुन, कि सब मुंदरी हसीद काड्डा मा पंगत पंगत दा कुरस बुळी. 40 आग आंदुर सौ सौ अदकि पचास पचास माळकु पंगत पंगत दा कुरतोदुर.

41 आव आ अईद रोट्टीगोळी अदकि येढढ मेनगोळी हुळदुन, अदकि स्वरग दी नोळकु परमेश्वर उक धन्यवाद माळदुन, अदकि रोट्टीगोळ मुरू-मुरूकु चेलागोळी कोळतोदुन कि आंदुर लॉकुरी वाळसुल, अदकि अव येढढ मेनगोळ भी आ सब मुंदुर दा वाळस बुट्टुन. 42 अदकि सब मुंदुर तनिकु संतुष्ट आगोदुर.

43 अदकि चेलागोळ मक्कि कु रोट्टीगोळ अदकि मेनगोळ्द तुकळा देल हन्नेळ फुट्टीगोळ तुमकु नेगदुर. 44 यार रोट्टीगोळी तदुर, आंदुरदा सर्फि मंळसागोळ्द संख्या अईद हजार ईरोद.

यीशु उन नीर मा नळोद

(मत्ती १४:२२-३३; यूहन्ना ६:१५-२१)

45 आग यीशु तुरन्त तान चेलागोळी ड्वांगा मा कुरोर साटी मजबुर माळदुन कि आंदुर आऊन से पयले झील इन आप्पाटी बैतसैदा नगर इक होटोगुल, कि आव आगासताका लॉकुरी सार माळयान. 46 लॉकुरी सार माळकु यीशु पहाळी मा प्रार्थना माळली होटोदुन. 47 याग द्याव मुळकेत, रा आग ड्वांगा झील इन न्याड्या दा ईरोद, अदकि यीशु आबना क्यार्रा अन्द भूमी

* 6:37 ६:३७ दीनार-ऊद चाँदी इन सक्का याने ऊद दनि इन रोजी

इन कनिरा मा ईरोन. 48 याग यीशु नोळदुन कि आंदुर ड्वांगा नळ्स नळ्सकु घबरूसेग्यार, यतकी आँधी ड्वांगा अन्द ऊलट ईरोद, रा ईळ्लक इन मुर अदकि आर पहर इन हात्ती आव झील मा नळुतेला आंदुर हात्ती बंदुन; अदकि आंदुर से मुंद होटबुळोद चाहासोन. 49 लेकीन आंदुर आऊक झील मा नळुतेला नोळकु रा समसदुर कि ईद ऊंद भूत हुन, अदकि चलिळास कुरतुर;

50 यतकी सप्पा मुंदुर आऊक नोळकु अंजेगीदुर. लेकीन यीशु तुरन्त आंदुर से मात हेळदुन अदकि अंदुन, “हमिमत ईटी: ना हुईन; अंजबाळी!” 51 आग आव आंदुर हात्ती ड्वांगा मा बंदुन, अदकि हवा रूकसेत: अदकि आंदुर हापाळ अच आश्चर्य माळली कुरतुर. 52 आ चेलागोळ अईद हजार लॉकुरी रोटीगोळ तनिसोद मात सम्स ईला सकीदुर, यतकी आंदुर अव मन कट्टर आगेगीदव.

गन्नेसरत दा यीशु रोगीगोळी चंगा माळदुन (मत्ती १४:३४-३६)

53 यीशु अदकि आऊन चेलागोळ आप्पाटी ईळुकु गन्नेसरत इन भूमी मा पोहचुसदुर, अदकि ड्वांगा घाट इन कनिरा मा हचदुर. 54 याग आंदुर ड्वांगा मा टु ईळदुर, रा लॉकुर तुरन्त यीशु उक अर्त कोंडुर. 55 आसपास इन पुरा प्रदेश दा हरदुर, अदकि बमारगोळी व्हर्स मा मगिसकु, येल येल समाचार केळदुर कि आव हुन, अल अल हरूतेला वयाळदुर. 56 अदकि येल्यारा यीशु ऊरगोळ, नगरगोळ या मोहल्ला दा होगतोगोन, रा लॉकुर बमारगोळी सात्तागोळ दा ईटकु आऊन से वनिती माळतोगोर, कि आव आंदरी तान कपळा अन्द पल्लाक अच मुट गोळुल: अदकि यास आऊक मुटतोगोर, आंदुर सब चंगा आगेगोर.

पुर्वजगोळ्द परंपरा अन्द प्रश्न
(मत्ती १५:१-९)

1 आग फरीसी अदकि थ्वाळासा शास्त्री जो यरूशलेम टु बंदीदुर, यीशु उन आसपास जमा आदुर, 2 आंदुर नोळदुर कि फरीसीगोळ्द शक्षिा अन्द अनुसार अशुध्द मतलब बनिा कय तोळ्द आऊन चेलागोळ रोटीगोळ तनित्यार.

3 यतकी फरीसी अदकि सप्पा यहूदी, तान पुर्वजगोळ्द परंपरा मा नळुतार, अदकि आंदुर आगासताका ऊमालुर यागासताका वळ्लीसा कय तोळ्द कोमालुर. 4 सात्ता टु तर्त यातोदु चजि इक बनिा तोळ्द तनिलुर, अदकि हगि हापाळ सा दुसरा मातगोळ आव, जो पुर्वजगोळ्द शक्षिा अन्द अनुसार आंदुर हात्ती मानसोर साठी पोहचुस्कु आग्याद, जसा कटोरा, अदकि गळु, व्हर्स अदकि तांबा नव बरतनगोळी तोळोद.

5 इंदुरसाटी आ फरीसी अदकि नयिम इन शास्त्रीगोळ आऊन से केळदुर, “नीनोर चेलागोळ येती पुर्वजगोळ्द परंपरा अन्द पालन माळालुर, अदकि बनिा कय तोळ्द रोटी तनितार?”

6 यीशु आंदुर से अंदुन, यशायाह नीम कपटीगोळ्द बारा दा खरा अच भवषियवाणी माळीदुन; हयांग लखिस्कु आद;

ई लॉकुर टुटगोळ देल रा नान आदर माळतार,
लेकीन इंदुर मन नान से दुर ईरतद.

7 इंदुर बेकार अच नान उपासना माळतार,
यतकी इंदुर खुद इन नयिमगोळी
परमेश्वर उन नयिम माळकु कल्सतार.

8 यतकी नीव परमेश्वर उन आग्या अक टाल्सकु मंळसागोळ्द रीतीगोळी मान्सतीर.

9 यीशु आंदुर से अंदुन, नीव परमेश्वर उन आग्या अक टाल्सदुर दा बळा चतुर आगेगीर, कितान परंपरागोळ्द स्थापना माळ सक्कीर. 10 यतकी मूसा अंदान, तान आप्प अदकि तान

मोय इन आदर माळी अदकि जो यावारा भी तान आप्प या मोय इक बुरा भला अनुल, रा आऊक जरूर कौद बुळी. 11 लेकीन नीव अनतीर क्कि अगर यावारा तान आप्प या मोय से अनुल, जो येनारा नीनी नान से लाभ आग सकौद, अद ना पयले टु उच परमेश्वर उक अर्पति माळ बुटीन. 12 रा नीमी आऊन आप्प या आऊन मोय इन स्यावा ईला माळोद बहाना सकिकेगतद. 13 ई प्रकार देल नीव लॉकुर तान परंपरागोळ देल, नयिम ठहरूसतीर, अदकि परमेश्वर उन वचन टाल्स बुळतीर; अदकि हगि हापाळ सा मातगोळ माळतीर.

मंळसागोळी अशुध्द माळव मातगोळ (मत्ती १५:१०-२०)

14 आग यीशु लॉकुरी तान हात्ती कारूकु आंदुर से अंदुन, “नीव सब नान मातगोळ केळी, अदकि समसी. 15 हगि रा यातोद भी वस्तु ईलच जो मंळसा दा व्हार्या टु बुळ्क बंदकु आऊक अशुध्द माळीत लेकीन जो वस्तुगोळ मंळसा अनद बुळ्क टु व्हार्या होळताव अव अच रा मंळसा अक अशुध्द माळताव. 16* अगर यारोवारा केळव कवि आव रा केळ कोमुल.”

17 याग यीशु भीळ इन हात्ती टु मान्या होदुन, रा आऊन चेलागोळ ईद उदाहरण इन बारा दा आऊन से केळकु समझसली हेळदुर. 18 यीशु आंदुर से अंदुन, येन नीव भी हगि नासमज आईर? येन नीव समसालीर क्कि जो वस्तु व्हार्या टु मंळसा अनद बुळ्क होगतद, अद आऊक अशुध्द माळ सकाल? 19 यतकी अद आऊन मन दा ईला, लेकीन आऊन व्हाट्टा दा होगतद अदकि थाळ्लकु दा टु व्हार्या होट्ट बुळतद! ईद अनकु आव सप्पा भोजन वस्तुगोळी शुद्ध ठहरूसदुन.

20 बाक यीशु अंदुन, “जो मंळसा अन मन दा टु होळतद, अदा मंळसा अक अशुध्द माळतद. 21 यतकी बुळ्क टु, मतलब

* 7:16 ७:१६ अगर यारोवारा केळव कवि आव रा केळ कोमुल

का मंळसा अन मन दा टु, बेकार-बेकार वचार, व्यभचार, दुष्टता, काळलपनी, कोनूद, परस्त्रीगमन, ²² लोभ, छल-कपट, लुचपन, बुरानजर, ईर्ष्या, अपमान, अभिमान, अहंकार अदकि मूर्खता होळतद. ²³ ई सप्पा बुरा मातगोळ मन इन बुळ्क टु होळताव अदकि मंळसा अक अशुध्द माळताव.”

गैरयहूदी आर्त इन वश्वास (मत्ती १५:२१-२८)

²⁴ बाक यीशु अल टु यदकु सूर इन आसपास इन प्रदेश दा बंदुन; अदकि ऊंद मान्या होदुन अदकि आव ईला चाहासोन का यारीकु पता नळुल; का आव अल आन लेकीन तरी भी आव होचकोम सकदील. ²⁵ अदकि तुरन्त ऊंद आर्त यार्द स्यांळ्द पोर इन दा दुष्टआत्मा ईरोद, आऊन बारा दा केळकु, अदा घनी आऊन हात्ती बंदुर अदकि आऊन कालगोळ मा बदिदुर. ²⁶ ई आर्त गैरयहूदी ईरोर अदकि सीरयिा अन्द फनीकी दा पैदा आगीदुर. आक यीशु से वनिती माळदुर का नान पोर इन दा टु दुष्टआत्मा तेगुकोळ. ²⁷ यीशु आकनि से अंदुन, “पयले पारगोळी संतुष्ट आगगोळ, यतकी पारगोळ्द रोटी हुळकु नायगोळ्द मुंद हाक्कोद उचति हैलेच.”

²⁸ लेकीन आ आर्त यीशु उक उत्तर कोट्टुर, “खरा आद प्रभु; तरी भी नायगोळ भी रा मेज इन ल्यालमा चकिोर्द रोटी इन चुराचारा तनि कोमताव.”

²⁹ इदुरसाटी यीशु आ आर्त इन से अंदुन, “ई उत्तर इन कारण दैल होटोग; दुष्टआत्मा नीन पोर इन मय दा टु होटबुटाद.”

³⁰ अदकि आक तान मान्नी बंदकु नोळदुर का पोर व्हर्स मा मगिकु आर, अदकि दुष्टआत्मा आकनि मय दा टु होटबुटाद.

यीशु बयरा अदकि तोतळा मंळसा अक चंगा माळदुन

31 बाक यीशु सूर हेसुर इन प्रदेश टु होटकु सैदा टु आगतेला गलील इन क्यार्रा मा बंदकु आव दकियापुलसि ताका बंदुन. 32 रा लॉकुर ऊंद बयरा अक जो तोतळा भी ईरोन, यीशु उन हात्ती तंदकु आंदुर आऊन से वनिती माळदुर कि तान कय आऊन मा ईटुल. 33 आग यीशु आऊक भीळ टु अलग आबना दा ओतुन, अदकि तान बेळ्लगोळी आऊन कवि दा हाकदुन, अदकि ऊगुळकु आऊन ल्यालग्या अक मुटदुन; 34 अदकि स्वर्ग इन दी नोळकु लंबा सास ताकोंडुन, अदकि आऊन से अंदुन, “इप्फत्तह!” मतलब “तेरदोग!”

35 अदकि आऊन अव कवि तेरदोदव, अदकि आऊन ल्यालग्या अनूद गाठ भी तेरदोत, अदकि आव साफ साफ माताळली कुरतुन. 36 आग यीशु आंदरी चेतावनी कोट्टुन कि यारीकु हेळबाळी; लेकीन याट आव आंदरी चेतावनी कोटीदुन आट अच आंदुर मात प्रचार माळली कुरतुर. 37 आंदुर हापाळ अच आश्चर्य चकति आगकु अनली कुरतुर, “यीशु याट वळ्ळीद तरीका देल ई सब येनारा माळतान; आव बयरागोळी भी केळोद, अदकि मुक्कागोळी माताळोद शक्तिकोळतान.”

8

नाक हजार लॉकुरी ऊमली कोळोद
(मत्ती १५:३२-३९)

1 आ दनिगोळ दा याग धोळ्द भीळ जमा आत, अदकि आंदुर हात्ती तनिली येनु ईला ईरोद, रा यीशु तान चेलागोळी हात्ती कारूकु आंदुर से अंदुन, 2 “नानी ई भीळ मा हापाळ दया बरेत्याद यतकी इंदुर मुर दनि टु बराबर नान सांगुळ आर, अदकि इंदुर हात्ती तनिली येनु हैलेच! 3 अगर ना आंदरी उपासी मान्या कळाईन, रा हादी मा थक्सकु बदिदार; यतकी आंदुर दा टु यार यारारा हापाळ दुर टु बंदार.”

4 यीशु उन चेलागोळ आऊक उत्तर कोट्टुर, “ईल आळी दा ईस रोट्टी यारारा यल टु तर सकतार कि इंंदुर संतुष्ट आगुल?”

5 यीशु आंदुर से केळदुन, “नीम हात्ती यास रोट्टीगोळ आव?”

आंदुर अंदुर, “येळ.”

6 आग यीशु भीळ इक ल्यालमा कुरोद आदेश कोट्टुन, अदकि आ येळ रोट्टीगोळी हुळदुन, अदकि परमेश्वर उक धन्यवाद माळकु मुरदुन, अदकि अवरी तान चेलागोळी कोट्टुन कि आंदुर आ मंळसागोळ मुंद ईंटुल, अदकि आंदुर लॉकुर मुंद वाळ्स बुदुर!

7 आंदुर हात्ती थ्वाळासा स्याणेव मेनगोळ भी ईरव. आव अऊर मा परमेश्वर उक धन्यवाद माळकु अवरी भी लॉकुर दा वाळ्सली अंदुन. 8 आंदुर तनिकु संतुष्ट आगेदुर अदकि चेलागोळ जो मगिद तुकळागोळ येळ फुट्टी तुमकु नेगदुर! 9 अदकि लॉकुर नाक हजार इन हात्तीपास ईरोर. यीशु आंदरी वदि माळदुन, 10 अदकि आव तुरन्त तान चेलागोळ सांगुळ ड्वांगा मा येरकु दलमनुता प्रदेश इक होटोदुन.

फरीसीगोळ यीशु उक चमत्कार माळली अंदुर
(मत्ती १२:३८-४२; १६:१-४)

11 ✨बाक फरीसी बंदकु यीशु से बैसबाजी माळली कुरतुर, अदकि आऊन परीक्षा ताकोमोर साटी आंदुर आऊन से ऊंद स्वर्गीय चमत्कार बेळदुर! 12 ✨आव तान आत्मा दा आह तुमकु अंदुन, “ई समय इन लॉकुर योना अनूद चमत्कार येती दुंदुसतार? ना नीम से खरा-खरा अनतीन कि ई समय इन लॉकुरी येनु चमत्कार कोटकु आगतीदील.”

13 अदकि यीशु आंदरी बटिकु ड्वांगा मा येरेदुन अदकि दुसरा कनिरा मा होटोदुन.

✨ 8:11 द:११ मत्ती १२:३८; लूका ११:१६
११:२९

✨ 8:12 द:१२ मत्ती १२:३९; लूका

फरीसीगोळ अदकि हेरोदेस उन खमीर
(मत्ती १६:५-१२)

14 चेलागोळ रोटी हुडोद मारतोगीदुर, अदकि ड्वांगा मा आंदुर हात्ती ऊंद अच रोटी ईरोद! 15 *यीशु आंदरी चेटावनी कोटकु अंदुन, “नोळी, फरीसी नव खमीर* अदकि हेरोदेस ईनव खमीर देल सावधान ईरी.”

16 आंदुर आपस दा मातचीत माळली कुरतुर, कि “नाम हात्ती रोटी हैलेच अनकु आव हगि अनेत्यान.”

17 ईद जान्सकु यीशु आंदुर से अंदुन, “नीव आपस दा येती ईद वचार माळतीर कि नाम हात्ती रोटी ईलच? येन नीम मन कट्टर आगेग्याव? 18 *येन कण्ण ईतकु भी नीव नोळ सकालीर? अदकि कवि ईतकु भी केळ सकालीर? अदकि येन नीमी याद ईलच?”

19 कयाग ना अईद हजार लॉकुर साटी अईद रोटी मुरददिन रा नीव तुकळा गोळ्द यास फुट्टी तुमकु नेगददीर? आंदुर यीशु से अंदुर, “हन्नेळ फुट्टीगोळ.”

20 अदकि येन नीमी याद हैलेच कि “याग ना नाक हजार लॉकुर साटी येळ रोटी मुरददिन रा नीव तुकळा गोळ्द यास फुट्टी तुमकु नेगददीर?”

आंदुर आऊन से अंदुर, येळ फुट्टीगोळ.

21 बाक यीशु आंदुर से केळदुन, “येन नीव ईगासताका समसीदील?”

यीशु बैतसैदा दा ऊंद कुढ्द मळसा अक चंगा माळदुन

22 आंदुर बैतसैदा दा बंदुर; अदकि लॉकुर ऊंद कुढ्द मळसा अक आऊन हात्ती तंदुर अदकि यीशु उन से वनिती माळदुर कि आऊक मुट्ट. 23 आव कुढ्द मळसा अन्द कय हुळकु आऊक ऊर इन व्हार्या ओतुन, अदकि आऊन कण्णगोळ मा उगुळकु

* 8:15 द:१५ लूका १२:१

* 8:15 द:१५ खमीर-फरीसीगोळ्द गलत शिक्षा

* 8:18 द:१८ मरकुस ४:१२

आऊन मा कय ईटदुन, अदकि आऊन से केळदुन, “येन नीनी येनारा कांळसतद?”

24 आव कण्ण नेगुकु अंदुन, “ना मंळसागोळी नोळ सकतीन; आंदुर नानी माररगोळ आसपास नळुतेला कांळसीत्यार.”

25 आग यीशु दुबारा आऊन कण्णगोळ मा कय ईटदुन, अदकि आ कुढ्ढ मंळसा ध्यान देल नोळदुन. आव चंगा आगेदुन, अदकि सब साफ-साफ नोळली कुरतुन. 26 यीशु आऊक ईद अनकु मान्नी कळुदुन, “ईद ऊर इन बुळ्क टु आगकु होगबाळ सीधा तान मान्नी होग.”

पतरस उन यीशु उक मसीह स्वीकार माळोद
(मत्ती १६:१३-२०; लूका ९:१८-२१)

27 यीशु अदकि आऊन चेला कैसरिया फलिप्पी इन ऊरगोळ दा होटोदुर! हादी मा आव तान चेलागोळ से केळदुन, “लांकुर नान बारा दा येन अनतार कनि याव हुईन?”

28 ✨आंदुर उत्तर कोट्टुर, ईव “यूहन्ना बपतस्मा कोळावाळा; पर यारारा ईव एलयियाह अदकि यारारा ईव भवष्यवक्तागोळ दा टु यावारा ऊंद हुन.”

29 ✨यीशु आंदुर से केळदुन, “लेकीन नीव नानी येन अनतीर?”
पतरस आऊक उत्तर कोट्टुन, “नी मसीह उध्दारक हुय.”

30 आग आव आंदरी आग्या कोटकु अंदुन कनि नान बारा दा यारीकु हेळबाळेतीर!

तांद मृत्यु अदकि पुनरूत्थान इन बारा दा यीशु उन भवष्यवाणी

(मत्ती १६:२१-२८; लूका ९:२२-२७)

31 आग यीशु तान चेलागोळी कलसली कुरतुन किमंळसा अन पार उन साटी जरूरी आद कि आव हापाळ दुख नेगदान, अदकि

✨ 8:28 द:२८ मरकुस ६:१४,१५; लूका ९:७,८ ✨ 8:29 द:२९ यूहन्ना ६:६८,६९

स्याणा अदकि प्रधान याजक, अदकि नयिम शास्त्रीगोळ द्वारा ठहरूसकु आगकु आऊक तुच्छ सम्सकु कौदबुटार, लेकीन आव मुर दनि इन बाद्दा जतिता आगेदान. 32 आव ईद मात आंदुर से साफ-साफ अंद बुट्टुन. इदुर मा पतरस आऊक दनकुसकु अंदुन हगि आगसकाल. 33 लेकीन यीशु तरिगकु तान चेलागोळ दी नोळदुन, अदकि पतरस उक दनकुसकु अंदुन, “हे शैतान, नान मुंद टु दुर आग; यतकी नी परमेश्वर उन मात मा ईला, लेकीन मंळसा अन मातगोळ मा मन हचत्त्या.”

34 ✨यीशु भीळ इक तान चेलागोळ सांगुळ हात्ती कारूकु आंदुर से अंदुन, “जो यावारा नान हदि बरोद चाहासतान, आव तान खुद इन इनकार माळुल अदकि आऊक दुख नेगोद बदिदीत अदकि सायोद बदिदीत आवा, तान कूस† नेगुकु, नान हदि आगुल. 35 ✨यतकी जो यावारा तान जीव ऊळसोद चाहास्यान आव अदरी खोऊस्यान, लेकीन जो यावारा नान अदकि खुशखबरी इन साटी तान जीव खोऊस्यान, आव अदरी ऊळस्यान. 36 अगर मंळसा पुरा दुनया अक हासलि माळुल अदकि तान जीव इन नुकसान आगगोळुल, रा आऊक येन लाभ आदीत? 37 मंळसा तान जीव इन बदला दा येन कोट्टान? 38 जो यावारा ईद व्यभचिारी अदकि पापी जाती इन न्याड्या नान से अदकि नान मातगोळ देल लाजुस्यान, ना मंळसा अन पार याग पवतिर स्वर्गदूतगोळ सांगुळ तान आप्प उन महमिा अन्द सांगुळ बराईन, आग आव नान से भी लाजुस्यान आंदरी भी ना अपनुसाईन.”

9

1 यीशु आऊन से अंदुन, “ना नीम से खरा-खरा अनतीन कि जो ईल नीदुरकु आर, आंदुर दा टु यारारा-यारारा हगि आर, कि

✨ 8:34 द:३४ मत्ती १०:३८; लूका १४:२७ † 8:34 द:३४ कूस-दुख इन प्रतकि

✨ 8:35 द:३५ मत्ती १०:३९; लूका १७:३३; यूहन्ना १२:२५

यागासताका परमेश्वर उन राज्य अक सामर्थ्य सहति बर्त नोळकोमालुर, आगासताका आंदुर सायतीदील.”

यीशु उन रूप बदलुसोद

(मत्ती १७:१-१३; लूका ९:२८-३६)

2 ✨आर दनि इन बाददा यीशु, पतरस, याकूब अदकि यूहनना अक सांगुळ हुळदुन, अदकि आबना अन दा ऊद धोळ्द पहाळी मा ओतुन. अल आंदुर मुंद आऊन रूप बदलुसेत, 3 अदकि आऊन कपळा हगि चमकुसली हतदव अदकि ईल ताका उजुळ आत, क्कि पृथ्वी मा यातोवारा धोबी भी हांग उजुळ माळ सकालुन. 4 अदकि आंदरी मूसा अन्द सांगुळ एलिय्याह काळसदुन; आंदुर यीशु उन सांगुळ मात माळतोगोर! 5 इदुर मा पतरस यीशु से अंदुन, “हे गुरु, नाम ईल ईरोद वळ्लीसा आद: इदुरसाटी नाव मुर हांदरा माळाता; ऊंद नीन साटी, ऊंद मूसा साटी, अदकि ऊंद एलिय्याह अन्द साटी.” 6 पतरस ईला जानसोन क्कियेन उत्तर कोळाईन, इदुरसाटी क्कि आंदुर हापाळ अंजेगीदुर!

7 ✨आग ऊंद बादल आंदरी घेरसकोम्त, अदकि आ बादल दा टु ईद आवाज होळ्त्त, इव नान प्रयि पार हुन, ईऊन केळी. 8 आग आंदुर अचानक नाकु दी नजर माळकु नोळदुर, अदकि यीशु उक बटिकु तान सांगुळ अदकि यारीकु नोळीदील.

9 पहाळी मा टु ईळा होती यीशु आंदरी आग्या कोट्टुन क्कि यागासताका ना मंळसा अन पार सोत्तुर दा टु जत्तिता आगालीन, आगासताका जो येनारा नीव नोळीर अद यारीकु हेळबाळेतीर.

10 आंदुर आऊन आग्या अक मान्सदुर; अदकि आपस दा चर्चा माळली हतदुर, “सोत्तुर दा टु जत्तिता आगोद येन मतलब

आद?” 11 ✨अदकि आंदुर आऊन से केळदुर, “बाक शास्त्री यती अनतार कि एलयियाह अन्द पयले बरोद जरूरी आद?”

12 आव आंदरी उत्तर कोट्टुन, “एलयियाह खराखुरा पयले बंदकु सब येनारा सुधारसली बंदान, लेकीन मंळसा अन पार उन बारा दा ईद येती लखिसकु आद कि आव हापाळ दुख नेगदान, अदकि टुकूरसकु आदान? 13 लेकीन ना नीम से अनतीन, कि एलयियाह रा होटबंदुन, अदकि जसा आऊन बारा दा लखिसकु आद, आंदुर ह्यांग चाहासदुर हांग अच आऊन सांगुळ माळदुर.”

यीशु दुष्टआत्मा हतकु पार उक चंगा माळदुन
(मत्ती १७:१४-२१; लूका ९:३७-४३)

14 याग यीशु चेलागोळ हात्ती बंदुन, रा नोळदुन कि आंदुरद नाकु दी धोळद भीळ हतकु आद, अदकि नियम इन शास्त्री आंदुर सांगुळ वविाद माळीत्यार. 15 आऊक नोळतेला अच सप्पा लाँकुर हापाळ आश्चर्य माळली कुरतुर, अदकि ह्यांग आंदुर यीशु उक नोळदुर रा आऊन दी ओळकु आऊक नमस्कार माळदुर. 16 यीशु आ चेलागोळ से केळदुन, “नीव इंदुर से येन बहस माळेतीर?”

17 भीळ दा टु ऊंद मंळसा यीशु उक उत्तर कोट्टुन, “हे गुरु, ना तान पार उक, यारदा मुक्की आत्मा समुस्याद, अदकि आव माताळ सकालुन नीन हात्ती तंददीन. 18 आक आऊक येल्यारा भी हुडूतार, अल्या पटकूस बुळतार: अदकि आव बाय दा फेस तरतान, अदकि हल्ल कचतान, अदकि वंळगतेला होगतान. ना नीन चेलागोळ से अंदीन कि नीव आ दुष्टआत्मा अक तेगी, लेकीन आंदुर तेगु सकदील.”

19 ईद केळकु यीशु चेलागोळी उत्तर कोटकु अंदुन, “हे अवशिवासी लाँकुरा, ना यागासताका नीम सांगुळ ईराइन?

अदकि यागासताका नीम्द सहन माळाईन? आ पार उक नान हात्ती तरी.”

20 आग आंदुर आ पार उक आऊन हात्ती तंदुर: अदकि याग आव आऊक नोळदुन, रा अद आत्मा तुरन्त आऊक मुरकुळसुत; अदकि आव जागा मा बदिदुन, अदकि बाय दा टु फेस तेगुतेला गळबळी तनिली कुरतुन.

21 यीशु आऊन आप्प उन से केळदुन, “ईऊंद हगि दशा यागी टु आद?” आव अंदुन, “बचपन टु. 22 आ दुष्टआत्मा ईऊक कोन्नोर साटी यागलु बेक्की दा अदकि यागलु नीर दा केडुकु कोन्नोद कोशशि माळतद; लेकीन अगर नी येनारा माळ सकत्या रा, नाम मा तरस तनिकु नाम सहायता माळ.”

23 यीशु आऊन से अंदुन, “अगर नी माळ सकत्या? रा वशिवास माळ. यतकी वशिवास माळावाळेरे साटी सब येनारा आग सकतद.”

24 पार उन आप्प तुरन्त गळिगळिसकु अंदुन, “हे प्रभु, ना वशिवास माळतीन, लेकीन नान वशिवास काफी हैलेच नांद अवशिवास इन उपाय माळ.”

25 याग यीशु नोळदुन कि लॉकुर ओळकु भीळ जमा माळीत्यार, रा आव दुष्टआत्मा अक ईद अनकु दनकुसदुन, “हे मुक्की अदकि दुश्मन दुष्टआत्मा, ना नीनी आग्या कोळतीन, आऊन दा टु होळबुळ, अदकि आऊन दा बाक यागलु प्रवेश माळबाळेत.”

26 आग दुष्टआत्मा चळिलासकु अदकि आऊक हापाळ मुरकुळसकु, हाट्ट बुळत; अदकि पार सोत्तुर घाई आगेदुन, ईल ताका कि हापाळ लॉकुर अंदुर, “आव सोतोदुन.” 27 लेकीन यीशु आऊन कय हुळकु आऊक येब्सदुन. अदकि आव पार नीदरेदुन.

28 याग यीशु मान्नी बंदुन, रा आऊन चेलागोळ आबना दा आऊन से केळदुर, “नाव आ दुष्टआत्मा अक आ पार उन दा टु यती तेगु सकदिील?”

29 आव आंदुर से अंदुन, “ईद प्रार्थना अन्द अलावा अदकि दुसरा उपाय देल होळ सकाल.”

तान सायोद बारा दा यीशु उन मात्तः भवष्यवाणी
(मत्ती १७:२२-२३; लूका ९:४३-४५)

30 बाक यीशु अदकि आऊन चेला अल टु होटक, गलील टु आगुत होगोर. आव ईला चाहासोन कियारीकु भी पता आगुल काना ईल आईन, 31 यतकी आव तान चेलागोळी उपदेश कोळोन अदकि आंदुर से अनतोगोन, “ना मंळसा अन पार, मंळसा अन कयदेला हुळसुसकु आगाईन, अदकि आंदुर नानी कोंद बुट्टार; अदकि ना सोतकु मुर दनि इन बाद्दा जतिता आगाईन.”

32 पर ईद मात आंदुरद समझ दा बंददिल, अदकि चेलागोळ यीशु उक केळोर से अंजतोगोर.

सब से धोड्डेव याव?

(मत्ती १८:१-५; लूका ९:४६-४८)

33 बाक आंदुर कफरनहूम दा बंदुर; अदकि मान्ना दा बंदकु यीशु चेलागोळ से केळदुन, “हादी मा नीव याता मात मा बहस माळीर?”

34 ✨लेकीन आंदुर सुंग्गा ईत्तुर, यतकी हादी मा आंदुर आपस दा ईद बहस माळीदुर कानाम दा टु धोड्डेव याव आन. 35 ✨आग यीशु कुरतकु हन्नेळ चेलागोळी कारदुन अदकि आंदुर से अंदुन, “अगर यावारा धोड्डेव आगोद चाहासतान, रा आव सब से स्याणेव अदकि सप्पा मुंदुरद सेवक आगुल.” 36 अदकि आव ऊंद पार उक हुळकु आंदुरद न्याड्या दा नीदूसदुन, अदकि आऊक मोगुल दा हुळकु आंदुर से अंदुन, 37 ✨“जो यावारा नान हेसुर देल ईत्ता पारगोळ दा टु यातोवारा ऊंद पार उक ग्रहण माळतान, आव नानी ग्रहण माळतान; अदकि जो यावारा नानी ग्रहण

✨ 9:34 ९:३४ लूका २२:२४ ✨ 9:35 ९:३५ मत्ती २०:२६,२७; २३:११; मरकुस १०:४३,४४; लूका २२:२६ ✨ 9:37 ९:३७ मत्ती १०:४०; लूका १०:१६; यूहन्ना १३:२०

माळतान, आव नानी ईला, लेकीन नानी याव कळ्यान आव आऊक ग्रहण माळतान.”

जो वरिध दा ईरोन, आव पक्ष दा आदुन
(लूका ९:४९-५०)

38 आग यूहन्ना यीशु से अंदुन, “हे गुरु, नाव ऊंद मळसा अक नीन हेसुर देल दुष्टआत्मागोळी तेगुतेला नोळदेव अदकि नाव आऊक मना माळली कुरतेव, यतकी आव नाम समुह दाकळव ईला ईरोन.”

39 यीशु अंदुन, “आऊक मना माळबाळी; यतकी हगि यारू हैलेच जो नान हेसुर देल सामर्थ्य इन कयाल्सा माळुल, अदकि राटनेरी नानी बुरा अन सकुल, 40 ✨यतकी आव नाम्द वरिध दा हैलेच, आव नाम्द सांगुळ आन. 41 ✨जो यावारा नीमी ऊंद वाटी नीर, इदुरसाटी कुळसुल का नीव मसीह नोर हुईर, रा ना नीम से खरा माताळतीन का आव तान प्रतफिल यातोदारा भी रीतदिल खोऊसतदिल.”

पाप माळावाळेरी इशारा
(मत्ती १८:६-९; लूका १७:१-२)

42 “जो यावारा भी स्याणेर दा टु नान मा वशिवास माळतार अदकि आंदरी यारारा ठोकर तनिस्थार रा आऊन साटी वळ्लीद ईद आद का ऊंद धोळ्द चक्की इन पट्टा आऊन कुतक्या दा लटकुसकु आगुल अदकि आव समुद्र दा हाककु आगुल. 43 ✨अगर नीन कय नीन पाप माळोद कारण बन्सतद रा वळ्लीद आद का अदरी कळ्द बुळ. डुण्डा आगकु जीवन दा प्रवेश माळेत, नीन साटी इदुर से भला आद का येढ्द कय ईतकु नी, नरक इन बेक्की दा हाककु आद्या जो यागलु नुनाल्द. 44 येल कळि सायाल्द अदकि बेक्की नुनाल्द. 45 अगर नीन काल पाप माळोद कारण आगुल रा अदरी कळ्द बुळ. लंगळा आगकु जीवन दा प्रवेश

✨ 9:40 ९:४० मत्ती १२:३०; लूका ११:२३ ✨ 9:41 ९:४१ मत्ती १०:४२ ✨ 9:43 ९:४३ मत्ती ५:३०

माळोद नीन साठी इदुर से वळ्ळीद आद कनि येद्व काल ईतकु नरक दा हाक्कु आद्या! 46 येल कळि सायाल्द अदकि बेक्की नुनाल्द!* 47 ✧अगर नीन कण्ण नीनी ठोकर तनिसतद रा, अदरी तेगुकु भीळ. वळ्ळीद आद कि कुद्व आगकु परमेश्वर उन राज्य दा प्रवेश माळ. अपेक्षा इदुरद कि नी येद्व कण्णगोळ ईतकु नरक दा हाक्कु आद्या! 48 यल कळि शाय्याल अदकि बेक्की नुनाल्द.”

49 यतकी हर ऊंद मळसा अक बेक्की देल शुद्ध माळकु आदीत? ह्यांग बलदान उक ऊप्प देल शुद्ध माळकु आगतद?

50 ✧“ऊप्प रा वळ्ळीसा आद; लेकीन अगर ऊप्प इन स्वाद ओळेत, रा अदरी मात नमकीन ह्यांग माळीर?”

ताम जीवन इक शुद्ध ईटी, जसा यातोदारा वस्तु ऊप्प देल शुद्ध माळकु आगतद, अदकि आपस दा संगीपना माळकु ईटी अदकि शांती देल ईरी.

10

छोळ चट्टी इन बारा दा यीशु उन शक्शा
(मत्ती १९:१-१२; लूका १६:१८)

1 बाक यीशु अल टु होटकु यहूदिया अन्द प्रदेश टु आगतेला यरदन गांगा अन कषेत्र अन्द आप्पाटी बंदुन. अदकि भीळ मात्त आऊन हात्ती बंदकु जमा आगेत, अदकि आव तान रीतर्ति अन्द अनुसार आंदरी मात्त उपदेश कोळली कुरतुन.

2 आग थ्वाळासा फरीसीगोळ आऊन हात्ती बंदुर अदकि आऊक फसुशोर कोशिशि दा आऊन से केळदुर, नामी हेळ “येन ईद नयिम इन अनुसार सही आद कि यावारा मळसा अन साटी ईद उचति आद कि आव तान हगिस् उक छोळ चट्टी कोळ्ळुल?”

* 9:46 ९:४६ ईद वचन हाळोद नयिम दा लखिसकु हैलेच ✧ 9:47 ९:४७ मत्ती ५:२९ ✧ 9:50 ९:५० मत्ती ५:३३; लूका १४:३४,३५

3 यीशु आंदरी उत्तर कोट्टुन, “मूसा नीमी यातोद नयिम कोटान?”

4 ✨आंदुर यीशु उक अंदुर, मूसा इजाजत कोटान कऱुंद मळसा छोळचट्टी लखिसकु तान हगिस उक बळि सकतान.

5 यीशु आंदुर से अंदुन, “मूसा नीम साटी ईद नयिम लखिसयान यतकी नीमी कलसोद हापाळ मुश्कलि आद. 6 लेकीन हयांग शास्त्र दा लखिसकु आद, सुरूवात दा परमेश्वर आंदरी गळ्स अदकि आर्त इन रूप दा माळदुन.” 7 ईद कारण देल ऊंद मळसा तान मोय-आप्प उक बटिकु तान हगिस उन सांगुळ ईत्तान. 8 अदकि आंदुर येढ्ढु मुंदुर ऊंद तन आदार; इदुरसाटी आंदुर ईग येढ्ढु ईला पर ऊंद तन आर. 9 इदुरसाटी आंदुर ईग येढ्ढु ईला, लेकीन ऊंद तन आर. इदुरसाटी यारीक परमेश्वर जोळसयान, अदरी यावारा भी मळसा अलग माळबाळुल.

10 याग आंदुर बाक मान्या वापस बंदुर आग चेलागोळ इदुर बारा दा यीशु उक मात्त केळदुर. 11 ✨आव आंदुर से अंदुन, ऊंद मळसा जो तान पयला हगिस उक छोळ चट्टी कोळतान अदकि दुसरा आर्त इन से मदा माळतान, रा आव तान पयला हगिस उन खलिाप व्यभचार माळतान. 12 अदुरदा घाई, ऊंद आर्त तान गांडु उक छोळ चट्टी कोळतार, अदकि दुसरा मळसा से मदा माळतार रा आक तान पयला गांडु उन खलिाप व्यभचार माळतार.

यीशु उन चकिरगोळी आश्रिवाद

(मत्ती १९:१३-१५; लूका १८:१५-१७)

13 बाक लॉकुर चकिरी यीशु उन हात्ती तरली कुरतुर कऱ आव आंदुर मा कय ईटुल, पर चेलागोळ लॉकुरी दनकुसदुर. 14 याग यीशु ईद नोळदुन रा सट्टी बंदुन अदकि तान चेलागोळ से अंदुन, “चकिरी नान हात्ती बरगोळी आंदरी मना माळबाळी, यतकी

परमेश्वर उन राज्य इंदुरदा हुन. 15 ✨ना नीम से खरा अनतीन क्ति जो यावारा परमेश्वर उन राज्य चकिोर घाई हासलि माळालुन, रा आव परमेश्वर उन राज्य दा यागलु उच दाखल आग सकालुन.” 16 आग यीशु आ चकिोरी क्वारा दा हुळदुन, अदकि आंदुर मा तान कय ईटकु आंदरी आशरिवाद कोट्टुन.

धनी मंळसा

(मत्ती १९:१६-३०; लूका १८:१८-३०)

17 याग यीशु अल टु होटकु हादी मा टु होगोन, रा ऊंद मंळसा आऊन हात्ती ओळतेला बंदुन, अदकि आऊन मुंद ट्वांगरा टेक्सकु आऊन से केळदुन, “हे वळ्लेव गुरु, अनन्त जीवन हासलि माळोर साटी नानी येन माळोद बदिदीत?”

18 यीशु आ धनी मंळसा से अंदुन, “नी नानी वळ्लेव येती अनत्या? परमेश्वर उन अलावा यारू वळ्लेव हैलेच. 19 नी परमेश्वर उन आग्यागोळी जान्सत्या: ‘थारीकु कोन्न बाळी, व्यभचारि माळबाळी, चोरी माळबाळी, यारदारा खलिाप ख्वाटा गवाही कोळबाळी, बयमानी माळबाळी, तान आप्प अदकि तान मोय इन आदर माळी.’”

20 आ मंळसा यीशु से अंदुन, “हे गुरु, ना रा स्याणपणी टु ईव सप्पा मातगोळ्द पालन माळतेला बंदीन.”

21 यीशु आऊक प्यार देल नोळदुन अदकि अंदुन, “नीन दा ईग भी ऊंद मात इन कमी आद जो येनारा नीन हात्ती आद, अदरी मारकु अव पैस्या गरीब लॉकुर दा वाट्स बुळ. नीनी स्वर्ग दा धन सक्कीत, अदकि बंदकु नान हदि आगेग.” 22 याग आ मंळसा ई मातगोळी केळदुन रा आऊन मार्रा अन्द नीर हारेत अदकि आव उदास आगेदुन, यतकी आव हापाळ धनी ईरोन.

23 यीशु नाकु दी नोळकु तान चेलागोळ से अंदुन, “आ लाँकुर साटी, यार्द हातती धन आद, आंदरी परमेश्वर उन राज्य दा प्रवेश माळोद याट कठनि आद!”

24 चेलागोळ आऊन मातगोळ देल अचम्भति आदुर. इदुर मा यीशु मातत आंदरी अंदुन, “हे चकीरगोळा, जो धन मा भरोसा ईटतार, आंदुर साटी परमेश्वर उन राज्य दा प्रवेश माळोद याट कठनि आद! 25 परमेश्वर उन राज्य दा धनवान उन प्रवेश माळदुर देल ऊँट इन मुग्ग दा टु चुजी होटबुळोद आसान आद!”

26 इदुर मा चेलागोळ हापाळ चकति आगेदुर अदकि आबुर दाबुर से केळली कुरतुर, “रा बाक यार्द उद्धार आग सकतद?”

27 यीशु आंदुर दी नोळकु अंदुन, “ईद मंळसागोळ साटी असंभव आद, लेकीन परमेश्वर उन साटी सब येनारा सम्भव आद; यतकी परमेश्वर से सब येनारा आग सकतद.”

28 आग पतरस यीशु उक अनली कुरतुन, “नोळ, नाव रा सप्पा येनारा बटिकु नीन हदि आगेगेव.”

29 यीशु अंदुन, “ना नीम से खरा अनेतीन कि हगि यारू हैलेच, जो नान साटी अदकि खुशखबरी इन साटी मान्ना या वार्दुरी या आकतीगेरी या मोय या आप्प या चकीर-चळिगेर या केईगोळी बटि बुटीदान, 30 ई वर्तमान युग दा यक्कुल हापाळ हासलि माळ्यार. आंदुर सौ गुणा यक्कुल मान्ना, वार्दुर, आकतीगेर, मोयगोळ, चकीर अदकि केईगोळी हासलि माळ्यार. अदकि अऊर सांगुळ हापाळ दुखगोळी भी, अदकि बरावाळा युग दा आंदुर अनन्त जीवन हासलि माळ्यार. 31 *पर हापाळ सा लाँकुर जो पयला आर, आंदुर हदिळोर आदार; अदकि जो हदिळोर आर, आंदुर पयला आदार.”

तान सायोद बारा दा यीशु उन तसिरा भवषियवाणी
(मत्ती २०:१७-१९; लूका १८:३१-३४)

* 10:31 १०:३१ मत्ती २०:१६; लूका १३:३०

32 यीशु अदकि आऊन चेलागोळ ईग यरूशलेम इक होगोद हादी मा ईरोर. यीशु तान चेलागोळ से मुंद-मुंद होगोन, चेलागोळ घबरूसकु ईरोर अदकि जो लॉकुर आऊन ह्दि-ह्दि नळोर आंदुर अंजकु ईरोर. ऊंद घन मात्त यीशु तान हननेळ चेलागोळी अलग वोतकु आंदुर से अव मातगोळी अनली कुरतुन, जो आऊन सांगुळ आगव ईरव. 33 आव आंदुर से अंदुन, “केळी, नाव यरूशलेम इक होगेतेव, अदकि मंळसा अन पार प्रधान याजकगोळ अदकि नयिम उन शास्त्रीगोळ कय दा कोटक आदान, अदकि आंदुर आऊक कोन्नोर साटी आऊन मा दोष हच्यार, अदकि आंदुर आऊक गैरयहूदीगोळ कय दा कोट्टार. 34 आंदुर आऊन मज्याक हारस्यार, आऊन मा ऊगळ्यार, आऊक क्वाळागोळ देल बळदार, आऊक जान देल कोंद बुट्टार, अदकि मुर दनि इन बाद्दा आव जत्तिता आदान.”

याकूब अदकि यूहन्ना अन्द वनिती
(मत्ती २०:२०-२८)

35 आग जब्दी इन पार याकूब अदकि यूहन्ना यीशु उन हात्ती बंदुर अदकि अंदुर, “हे गुरु, नाव चाहासतेव क्जो येनारा नाव नीन से बेळेव, अद नी नाम साटी माळेत.”

36 यीशु आंदुर से अंदुन, “नीव येन चाहासतीर क्जि ना नीम साटी माळाईन?”

37 आंदुर यीशु से अंदुर, “नामी ईद अधकार कोळ क्जि नीन महमिा दा याग नी सहिसन मा कुरत्या, रा नाव चाहासतेव क्जि नाम दा टु ऊंद नीन ऊमा कय दी अदकि दुसरा अपमान डाक्या कय दी कुरूल.”

38 ✠लेकीन यीशु आंदुर से अंदुन, “नीव जान्सालीर क्जि नीव येन बेळेतीर. जो दुख इन प्याला ना कुडावाळा आईन, येन नीव

कुडू सकतीर? अदकि जो बपतस्मा ना ताकोमावाळा आईन येन नीव ताकोम सकतीर?”

39 आंदुर आऊन से अंदुर, “नाम से आग सकतद.” यीशु आंदुर से अंदुन, जो दुख इन प्याला ना कुडावाळा आईन,

नीव कुळदीर अदकि जो बपतस्मा ना ताकोमावाळा आईन अदरी ताकोडीर. 40 लेकीन नान अधकारि दा ईलच कियाव नान ऊमा कय दी अदकि डाक्या कय दी कुरतान. परमेश्वर यार साटी ईद तयार माळदुन, आंदरी बटिकु अदकि यारीकु तान ऊमा कय दी अदकि तान डाक्या कय दी कुरसोद नान क्याल्सा आलच.

41 दुसरा हत्त चलागोळ ईद केळदुर रा आंदुर याकूब अदकि यूहन्ना देल नाराज आदुर! 42 ✨इदुरसाटी यीशु आ सप्पा मुंदरी हात्ती कारूकु आंदुर से अंदुन, नीव जान्सालीर कि जो गैर यहूदीगोळव शासक समसतार इंदुर आंदुर मा प्रभुता माळतार; अदकि आंदुरदा जो धोड्डेर आर, आंदुर मा अधकारि जतुसतार, ईद नीव जान्सालीर. 43 ✨पर नीम दा हगि हैलेच, जो यावारा नीम दा धोड्डेव आगोद चाहासतान, रा नीमी बाकी लाँकुरद सेवक आग पायजे; 44 अदकि जो यावारा नीम दा प्रधान आगोद चाहासतान, आव नीम सप्पा मुंदुर दास आगुल. 45 यतकी ना मळसा अन पार इदुरसाटी बंददील कनिन स्यावा माळुल, पर ना इदुरसाटी बंदीन कि नीमद सप्पा मुंदुरद स्यावा माळाईन, अदकि लाँकुर अव पापगोळ छुटकारा अन्द साटी तान जीवन कोळ सकाईन!

कुढ्ढ बरतमाई इक कण्ण इन ज्योत कोळोद
(मत्ती २०:२९-३४; लूका १८:३५-४३)

46 बाक यीशु अदकि आऊन चलागोळ यरीहो दा बंदुर, अदकि याग आव अदकि आऊन चलागोळ ऊंद धोळ्द भीळ इन सांगुळ यरीहो दा टु होगोर, आग ऊंद कुढ्ढ भखिरी, यार्द हेसुर तमाई

✨ 10:42 १०:४२ लूका २२:२५,२६ ✨ 10:43 १०:४३ मत्ती २३:११; मरकुस ९:३५; लूका २२:२६

नव पार बरतमाई ईरोद, सळक इन कनिरा मा कुरतकु ईरोन.
47 आव ईद केळकु कयिीशु नासरी हुन, कारू-कारूकु अनली कुरतुन,
“हे दाऊद उन पारा यीशु नान मा दया माळ!”

48 आग हापाळ मुंदुर आऊक दनकुसदुर कि सुंगा ईर. पर आव
यक्कुल जोर देल कारूली कुरतुन, “हे दाऊद उन पारा नान मा दया
माळ!”

49 आग यीशु नदुरकु अंदुन, “आऊक कारी.” अदकि लाँकुर आ
कुढ्ढ मंळसा अक कारूकु आऊन से अंदुर.

हमिमत ईट, येळ! आव नीनी कारेत्यान!

50 आव तान कपळा भटिकु तुरन्त येद्दुन, अदकि यीशु उन
हात्ती बंदुन.

51 इदुर मा यीशु आऊन से अंदुन, “नी येन चाहासत्या कनिा
नीन साटी माळाईन?”

कुढ्ढ मंळसा आऊन से अंदुन, “हे गुरु, ना पयले घाई नोळोद
चाहासतीन.”

52 यीशु आऊन से अंदुन, “होटोग, नीन वशिवास नीनी
वळ्लीद माळबुटाद.”

आव तुरन्त नोळली कुरतुन, अदकि हादी मा आऊन हदि
आगेदुन.

11

यरूशलेम दा वजिय-प्रवेश

(मत्ती २१:१-११; लूका १९:२८-४०; यूहनना १२:१२-१९)

1 बाक याग आंदुर यरूशलेम इन हात्ती, जैतून पहाळी मा
बैतफगे अदकि बैतनयियाह अन्द हात्ती बंदुर रा यीशु तान
चेलागोळ दा टु येढ्ढ मुंदरी ईद सुझाव कोटकु कळ्ळुदुन, ² “कि
मुंदळोद ऊर दा होगी, अदकि अदुर दा पोहचुसतेला अच ऊंद गधा
अन पाड्डा, अदुर मा यागलु यारू कुरतीदील, अद नीमी कटकु
सक्कीत. अदरी बटिकु तरी. ³ अगर नीम से यारारा केळ्यार,

‘ईद येती माळतीर?’ रा अनेतीर, प्रभु उक इदुरद जरवत आद, अदकि आव तुरन्त अदरी बाक ईल वापस कळु बुटान.”

4 आंदुर होगकु आ गधा अन पाड्डा अक व्हाऱ्या द्वारा इन हात्ती चौक दा कटक नोळदुर, अदकि अदरी बळिली कुरतुर. 5 थ्वाळासा लॉकुर जो अल नीदुरकु ईरोर, यारारा यारारा अनली कुरतुर, ईद येन माळेतीर, गधा अन पाड्डा अक येतरी बळिली?

6 अदकि यीशु ह्यांग हेळीदुन आंदुर हांग अच आंदुर से अंद बुटुर; आग लॉकुर आंदरी आ पाड्डा अक वोयगोटुर. 7 आंदुर पाड्डा अक यीशु उन हात्ती तनकु अदुर मा तान कपळा हाकदुर अदकि यीशु अदुर मा कुरतुन. 8 आग हापाळ सा लॉकुर तान कपळा हादी मा हासदुर अदकि हापाळ मुंदुर केईगोळ दा टु खजुर इन डगाली कळ-कळकु हादी मा हासदुर. 9 जो आऊन मुंद-मुंद होगोर अदकि जो हदि-हदि नळुतेला बरोर, कारू-कारूकु अनतेला होगतोगोर, “परमेश्वर उन स्तुती आगुल! जो प्रभु उन हेसुर देल बरतान! 10 नाम आप्प दाऊद उन बरावाळा राज्य इक परमेश्वर आशीष कोळुल अदकि परमेश्वर उन स्तुती आगुल!”

11 यीशु यरूशलेम पोहचुस्कु मंदरि दा बंदुन; अदकि नाकु दी सप्पा वस्तुगोळी नोळकु हन्नेळ चेलागोळ सांगुळ बैतनय्याह होदुन, यतकी द्याव मुळकेगीत.

यीशु अंजीर इन मार्र इक श्राप कोट्टुन
(मत्ती २१:१८-१९)

12 दुसरा दशी याग यीशु अदकि आऊन चेलागोळ बैतनय्याह टु वापस बरोर रा आऊक हसु हत्त. 13 अदकि याल्ला देल तुमकु ऊंद अंजीर इन मार्र इक दुर टु नोळकु, यीशु अदुर हात्ती होदुन कि अल येनारा तनिली सकिकेदति. अल पोहचुस्कु याल्ला गोळी बटिकु अदकि येनु ईला ईरोद, यतकी काय हत्तोद मौसम ईला ईरोद.

14 आग यीशु आ मार्र से अंदुन, “ईगी टु यारू नींद काय यागलु तनितीदील.” अदकि आऊन चेलागोळ केळोर.

यीशु मंदरि इन शुद्धीकरण माळदुन

(मत्ती २१:१२-१७; लूका १९:४५-४८; यूहन्ना २:१३-२२)

15 बाक यीशु यरूशलेम दा बंदुन अदकि आव मंदरि दा होगकु अल लेन-देन माळावाळेरी तेगुली कुरतुन, अदकि सावकारगोळ्द पांळसी अदकि कबूतर मारावाळेर्द चौकीगोळी ऊलटुसदुन; 16 अदकि आव यारीकु भी मंदरि दा टु आगकु सामान वयोद आग्या कोटीदील. 17 अदकि आव आंदरी उपदेश कोळली कुरतुन, “येन ईद शास्त्र दा लखिसकु हैलेच, ‘कनिनांद मान्ना सप्पा राष्ट्र अन साटी प्रार्थना अन्द मान्ना कहलुसीत?’ पर नीव अदरी डाकूगोळ्द हड्डा माळकु ईटीर.”

18 प्रधान याजकगोळ अदकि नयिम इन गुरुगोळ ईद केळदुर, रा आंदुर यीशु उक कोन्नोर साटी मवका हुंदूसली कुरतुर, यतकी आंदुर आऊन से अंजतोगोर, इदुरसाटी कनि सप्पा लांकुर आऊन उपदेश देल चकति ईरोर.

19 अदकि द्यावगा आगतेला अच, यीशु अदकि आऊन चेला नगर टु व्हार्या होटोदुर.

वंळगींद अंजीर इन मार्र टु शक्षिा

(मत्ती २१:२०-२२)

20 बाक दुसरा दशी व्हातर्या का याग आंदुर हादी मा टु होगोर रा आ अंजीर इन मार्र इक म्याकुच टु जळ ताका वंळगींद नोळदुर. 21 पतरस उक अद मात याद बत्त, अदकि आव यीशु से अंदुन, “हे गुरु, नोळ! ईद अंजीर इन मार्र यदरी नी श्राप कोटीद, वंळगोगयाद.”

22 यीशु आंदरी उत्तर कोट्टुन, “परमेश्वर मा वशिवास ईटी. 23 ✠ना नीम से खरा अनतीन कनि जो यावारा ई पहाळी से अंदान,

‘नी अल टु कत्तितेग, अदकि समुदर दा होगकु बळि,’ अदकि तान मन दा संक्या ईट बाळुल, लैकीन वशिवास माळुल कि जो अनतीन अद आगेदीत, रा आऊन साठी हांग अच आदीन. 24 इदुरसाटी ना नीम से अनतीन, कि जो येनारा नीव प्रार्थना माळकु बेळीर, रा वशिवास माळकोमी कि अद नीमी सकिकेत, अदकि अद नीमद आगेत. 25 *अदकि याग यागलु नीव नीदुरकु प्रार्थना माळतीर रा अगर नीम मन दा यारदारा प्रती येनारा वरोध आद, रा माफ माळी, इदुरसाटी कि नीम स्वर्गीय आप्प परमेश्वर भी नमिोव अपराध माफ माळुल. 26 *अदकि अगर नीव माफ माळतीदील रा नीम आप्प भी जो स्वर्ग दा आन नीम अपराध माफ ईला माळ्यान.”

यीशु उन अधिकार मा प्रश्न

(मत्ती २१:२३-२७; लूका २०:१-८)

27 आंदुर मात्त ऊंद घन यरूशलेम दा बंदुर, अदकि याग यीशु मंदिर दा वयाळोन रा प्रधान याजक अदकि नयिम इन गुरु अदकि स्याणागोळ आऊन हात्ती बंदकु केळली कुरतुर, 28 “नी ईद क्याल्सा याता अधिकार देल माळत्या? अदकि ईद अधिकार नीनी याव कोटान किनी ईद क्याल्सा माळत्या?”

29 यीशु आंदुर से अंदुन, “ना भी नीम से ऊंद प्रश्न केळतीन; नानी उत्तर कोळी रा ना नीमी हेळाईन कि ना ईद क्याल्सा यातोद अधिकार देल माळतीन. 30 यूहन्ना अक बपतस्मा कोळोद अधिकार स्वर्ग इन दी टु ईरोद या मळसागोळ दी टु ईरोद. नानी उत्तर कोळी.”

31 आग आंदुर आपस दा मातगोळ माळली कुरतुर कि अगर नाव अंदेव स्वर्ग इन दी टु, रा आव अंदान, बाक नीव यूहन्ना मा वशिवास येती माळीदील? 32 अदकि अगर नाव अंदेव,

☆ 11:25 ११:२५ मत्ती ६:१४,१५

* 11:26 ११:२६ ईद वचन हाळोद नयिम दा

हैलेच

मंळसागोळ दी टु, रा लॉकुर नाम मा अच सट्टि माळ्यार आंदुर नयिम इन गुरु लॉकुर से हापाळ अंजतोगोर यतकी सप्पा लॉक ईद मानसोर कियूहनना वास्तव दा ऊंद भवषियवक्ता आन.

33 इदुरसाटी आंदुर यीशु उक उत्तर कोट्टुर, “नाव जानसालेव.” यीशु आंदुर से अंदुन, “ना भी नीमी हेळालीन कर्ईद क्यालसा ना याता अधकार देल माळतीन.”

12

ठ्याका देल कोळद अंगुर इन केई इन उदाहरण
(मत्ती २१:३३-४६; लूका २०:९-१९)

1 बाक यीशु उदाहरणगोळ दा आंदुर से मात माळली कुरतुन; ऊंद घन ऊंद मंळसा ईरोन याव ऊंद अंगुर इन केई हचदुन, अदकि बेली इन नाकु दी ज्वाळा कटदुन, अदकि रास्सा अनद गड्डा अगुळदुन, अदकि मचान माळदुन; अदकि दुसरा केईवाळेरी आ अंगुर इन केई अनद ठ्याका कोटकु दुसरा द्याश दा होटोदुन. 2 बाक काय इन मौसम दा आव केईवाळेर हात्ती ऊंद दास उक कळुदुन, कर्आ केईवाळेर से अंगुर इन केई इन फसल इन हसिसा ताकोमुल. 3 लेकीन आंदुर आ दास उक हुळकु बळदुर अदकि आऊक खाली कय कळु बुटुर! 4 मालकि मात्त ऊंद दास उक आंदुर हात्ती कळुदुन; आंदुर आऊन ताल्ला ओळ्द बुटुर अदकि आऊन अपमान माळदुर! 5 बाक मालकि ऊंद दास उक अदकि कळुदुन; आंदुर आऊक कोंद बुटुर. अदकि आंदुर हापाळ लॉकुर सांगुळ हांगा व्यवहार माळदुर, आंदुर दा टु आंदुर यारीकारा बळदुर, अदकि यारीकारा कोंद बुटुर! 6 ईग ऊंदा ईरोन, जो आऊन प्रयि पार ईरोन; आखरी दा आव आऊक भी आंदुर हात्ती ईद सोचकु कळुदुन कर्आंदुर नान पार उन आदर माळ्यार. 7 लेकीन आ केईवाळेर आबुर दाबुर से अंदुर, ईवा रा वारीस हुन; बरी, नाव ईऊक कोंद बुळाता, अदकि आऊन धन दौलत नाम्द आदीत!

8 इदुरसाटी आंदुर आ पार उक हुळ कौडुर अदकि आऊक कौंद बुदुर, अदकि अंगुर इन केई इन व्हार्या भीट बुदुर!

9 इदुर मा यीशु से केळदुर अंगुर इन केई इन “स्वामी येन माळयान? आव बंदकु केईवाळ्द नाश माळयान अदकि अंगुर इन केई दुसरा अक कोट बुटान.” 10 येन नीव शास्त्र दा ईद वचन वाचुसीदील:

“याता कल्ल इक कारीगरीगोळ बेकार मानसीदुर,
अदा क्वाना अनंद महत्वपुर्ण कल्ल बनसेत;

11 ईद प्रभु अनंद दी टु आत,
अदकि नाम नजर दा अदभुत आद.”

12 आग नयिम इन गुरुगोळ आऊक हुडोद चाहासदुर; यतकी समसेगदुरि कर् यीशु नाम वरिध दा ईद उदाहरण अंदान. लेकीन आंदुर लाँकुर से अंजोर, अदकि आऊक बटिकु होटोदुर.

सरकार उक कर कोळोद
(मत्ती २२:१५-२२; लूका २०:२०-२६)

13 आग आंदुर आऊक मातगोळ दा फसुसोरसाटी येनारा फरीसीगोळ अदकि हेरोदेस राजा अनंद पक्ष इन येनारा लाँकुरी यीशु उन हात्ती कळुदुर. 14 अदकि आंदुर बंदकु आऊन से अंदुर, “हे गुरु, नाव जान्सतेव, कर् नी खरा आय, अदकि यारदु परवा माळाल; यतकी नी मंळसागोळ्द बाय नोळकु मात माळाल, लेकीन परमेश्वर उन खरा हादी कल्सत्या! रा येन सरकार उक कर कोळोद उचित आद का ईला?”

15 आव आंदुर्द कपट जान्सकु आंदुर से अंदुन, “नानी येती फसुसोद कोशशि माळेतीर? ऊंद दीनार नान हात्ती तरी, कर् ना अदरी नोळाईन.”

16 आंदुर ऊंद चाँदी इन सकिका आऊन हात्ती तंदुर, अदकि आव आंदुर से अंदुन, “ईद छाप अदकि हेसुर यार्द हुन?”

आंदुर अंदुर, “रोमन राजा अनंद हुन.”

17 अदकि यीशु आंदुर से अंदुन, “जो रोमन राजा अनन्द हुन अद रोमन राजा अक कोळी, अदकि जो परमेश्वर उन आद अद परमेश्वर उक कोळी.”

अदकि आंदुर यीशु नव मात केळकु चकति आगेदुर.

दुबारा मात्त मदा माळोद

(मत्ती २२:२३-३३; लूका २०:२७-४०)

18 *बाक सदूकीगोळ भी, जो अनतार कि सोत्त मळसागोळ्द जत्तिता आगेद हई हैलेच, यीशु उन हात्ती बंदकु आऊन से केळ कुरतुर, 19 आंदुर अंदुर, “हे गुरु, आंदुर यीशु उक अंदुर, मूसा इजाजत कोटान कि ऊंद मळसा छोळ चट्टी लखिसकु तान हगिस् उक तलाक कोळ सकतान. नाम साटी लखिस्यान कि अगर यारदारा वार्ट बनि औलाद पैदा माळ्त्त सोतोदान अदकि आऊनोर हगिस् ईतोदार, रा आऊन वार्ट आऊन हगिस् उन से मदा माळ कोमुल, अदकि तान वार्ट उन साठी वंश पैदा माळुल. 20 ऊंद जागा दा येळ वार्टुर ईरोर. पयला वार्ट मदा माळकु बनि औलाद सोतोदुन; 21 आग दुसरा वार्ट आ आर्त्त से मदा माळ कौडुन अदकि आव भी बनि औलाद सोतोदुन; अदकि हांग अच तसिरा भी माळदुन. 22 अदकि येळु वार्टुर्द ऊंद भी औलाद आगीदील. सप्पा मुंदुर हदि आ आर्त्त भी सोतोदुर. 23 इदुरसाटी पुनरूत्थान आगेदुर बाद्दा आक आंदुर दा टु यारोर हगिस् आदार? यतकी आक रा येळु मुंदुर हगिस् आगेगीदुर.”

24 यीशु आंदुर से अंदुन, “नीव रा शास्त्र अक जान्सतीर, अदकि ना ही परमेश्वर उन सामर्थ्य इक इदुरसाटी नीव गलती माळतीर? 25 यतकी याग आंदुर सोत्तुर दा टु जत्तिता आदार, रा आंदुर ना मदा माळ्यार अदकि ना मदा दा कोटकु आदार, लेकीन स्वर्ग दा स्वर्गदूतगोळ घाई आदार. 26 सोत्तुर दा टु जत्तिता आगेद बारा दा येन नीव मूसा अनन्द कतिब दा होत्त ज्ञाळी

इन कात्ता दा वाचुसीदील कि परमेश्वर आऊन से अंदुन, 'ना अब्राहम उन परमेश्वर, अदकि इसहाक उन परमेश्वर, अदकि याकूब उन परमेश्वर हुईन?' 27 परमेश्वर जो सोत्तुर आंदुरव ईला उलटा जतितागोळोव परमेश्वर हुन; इदुरसाटी नीव पुरा पुरा तरीका देल ख्वाटा आईर."

सब से धोळ्द आग्या

(मत्ती २२:३४-४०; लूका १०:२५-२८)

28 आग शासत्रीगोळ दा टु ऊंद बंदकु आंदरी वविाद माळ्त केळदुन, अदकि ईद जान्सकु कि यीशु सदूकीगोळी वळ्लीद रीर्ता देल उत्तर कोट्टुन, आऊन से केळदुन, "सब से मुख्य आग्या यातोद आद?"

29 यीशु आऊक उत्तर कोट्टुन, सब आग्यागोळ दा टु ईद मुख्य आद: "हे इस्त्राएल इन लॉकुरा केळी! प्रभु नामव परमेश्वर ऊंदा प्रभु आन, 30 अदकि नी प्रभु तान परमेश्वर से तान पुरा मन देल, अदकि तान पुरा जीव देल, अदकि तान पुरा बुद्धी देल, अदकि तान पुरा ताकत देल प्यार ईटेत." 31 अदकि दुसरा आग्या ईद आद, "नी तान मान्ना हातळोर से तांदा घाई प्यार ईटेत. ईव येदूढ आग्यागोळी बटिकु दुसरा यातु धोळ्द आग्या ईलच."

32 नयिमगोळ गुरु यीशु से अंदुन, "हे गुरु," हापाळ वळ्लीद! नी खरा अनंद कि परमेश्वर ऊंदा आन, अदकि आऊक बटिकु अदकि याऊ दुसरा परमेश्वर हैलेच. 33 अदकि आऊन से पुरा मन, अदकि पुरा बुद्धी, अदकि पुरा जीव, अदकि पुरा ताकत देल प्यार ईटेत; अदकि बाजुवाळेर से तान घाई प्यार ईटेत, पुरा अग्न-बलगिोळ्द अदकि पशु-बलगिोळ से यक्कुल आद.

34 ✨याग यीशु नोळदुन कि आव समझदारी देल उत्तर कोट्टुन, रा आऊन से अंदुन, "नी परमेश्वर उन राज्य टु दुर हैलेच."

अदकि यारीकु बाक आऊन से येनु केळोद हमिमत आगीदील.

मसीह दाऊद उन पार हुन?

(मत्ती २२:४१-४६; लूका २०:४१-४४)

35 बाक यीशु मंदिर दा उपदेश माळतेला ईद अंदुन, “नयिम इन गुरुगोळ अंदुर की मसीह ह्यांग दाऊद उन औलाद आग सकतान?” 36 दाऊद तान पवतिर आत्मा अन्द सामर्थ्य देल हगि अंदुन:

प्रभु परमेश्वर नान प्रभु से अंदुन,

“नान ऊमा कय मा कूरुल,

यागासताका की ना नीनोर दुश्मनगोळी अपमान काल दशी तरालनि.”

37 दाऊद रा खुद अच आऊक प्रभु अनतान, बाक आव आऊन पार ह्यांग आदुन?

नयिम इन गुरुगोळ से सावधान ईरी

(मत्ती २३:१-३६; लूका २०:४५-४७)

अदकि भीळ दाकळोर लॉकुर आऊद मात खुशी देल केळतोगोर. 38 यीशु तान उपदेश दा आंदुर से अंदुन, “शास्त्रीगोळ से सावधान ईरी, सम्मान सकिकोर साटी आंदुर ऊद-ऊद च्वांगा हाककु वयाळतार अदकि सात्तागोळ दा खुद इक नमस्कार माळसुसोद आंदरी वळ्ळीद हततद. 39 अदकि यहूदी लॉकुरद सभागृहगोळ दा मुख्य आसन अदकि भोज दा मुख्य जागा भी चाहास्तार. 40 आंदुर रांड्यागोळ्द मान्नागोळ इक तदि बुळतार, अदकि लॉकुरी दखावा साटी हापाळ होत्त ताका प्रार्थना माळतेला ईरतार. इंदरी यक्कुल से यक्कुल दण्ड सकिकीत.”

कंगाल रांड्या अन्द दान

(लूका २१:१-४)

41 यीशु मंदरि इन दानपेटी इन मुंद कुरतकु नोळतोगोन कि लॉकुर मंदरि इन दानपेटी दा याता प्रकार देल पैस्या हाकतार; अदकि यक्कुल पैस्यावाळेर लॉकुर भी हापाळ येनारा हाकदुर. 42 इट्टुर दा ऊंद कंगाल रांड्यागीत बंदकु तांबा अनन्द येदूढ स्याण-स्याणेव सक्का हाकदुर यदुर कमित ईतु आतुटु ऊंद पैस्या अनन्द बराबर ईतीदाद, हाकदुर. 43 आग यीशु तान चेलागोळी हात्ती कारूकु आंदुर से अंदुन, “ना नीम से खरा खरा अनतीन, कि मंदरि इन दानपेटी दा हाक्कावाळेर दा टु ई कंगाल रांड्यागीत सप्पा मुंदुर से यक्कुल हाकदुर; 44 यतकी सप्पा मुंदुर तान बळोतरी दा टु हाक्यार, लेकीन इक तांद कमी दा टु जो येनारा आकनि ईरोद, इदुर मतलब तांद पुरा जीवकि हाक्क बुटार.”

13

मंदरि इन वनाश इन भवषियवाणी
(मत्ती २४:१-२; लूका २१:५-६)

1 याग यीशु मंदरि टु होळोन, रा आऊन चेलागोळ दा टु ऊंद चेला आऊन से अंदुन, “हे गुरु, नोळ, ह्यांग धोड्डेव कल्ल अदकि ह्यांग भव्य भवन आव!”

2 यीशु आऊन से अंदुन, “येन नीव इव धोड्डेव-धोड्डेव भवन नोळतीर: ईल कल्ल मा कल्ल भी ऊळ्दकु ईरतीदील जो ढाऊस्कु आगतीदील.”

यीशु परेशानी अदकि सताव इन बारा दा हेळदुन
(मत्ती २४:३-१४; लूका २१:७-१९)

3 याग यीशु जैतून इन पहाळ मा मंदरि इन मुंद कुरतकु ईरोन, रा पतरस अदकि याकूब अदकि यूहन्ना अदकि अन्दरियास अलग होगकु आऊन से केळदुर, 4 “नामी हेळ कि ईव मात याग आदव? अदकि याग ईव सब मात पुरा आग्त होदव आ समय इन येन चनिह ईत्तीत?”

5 यीशु आंदुर से अनली कुरतुन, सावधान ईरी क्कियारू नीमी भरमुस बाळुल. 6 अनेक नान हेसुर देल ईद अनतेला बंदार, “ना मसीह हुईन!” अदकि आंदुर हापाळ मुंदरी भरमुस्यार. 7 याग नीव लळाईगोळ मातचीत केळीर अदकि लळाईगोळ्द बारा दा अफवाह केळीर, रा घबरूस बाळेतीर; यतकी अव मातगोळ्द ईरोद जरूरी आद, लेकीन आ समय दा अनूत आगतीदील. 8 यतकी द्याश मा द्याश, अदकि राज्य मा राज्य चढाई माळ्यार. हर जागा दा भूकम्प आदव, अदकि अकाल बदिदव. ईद रा भयानक दुख इन सुरूवात आदीत.

9 ☆“लेकीन नीव तान बारा दा सावधान ईरी; यतकी लॉकुर नीमी महासभागोळ दा सोपस्यार अदकि नीव पंचायतगोळ दा बळसकोडीर, अदकि नान कारण न्यायाधीशगोळ अदकि राजागोळ मुंद नदिरूसकु आदीर, ताकी नीम साटी खुशखबरी केळसोर साटी मौका आदीत.” 10 पर जरूरी आद क्कियल्ला खुशखबरी सब जातीगोळ्दा प्रचार माळकु आगुल. 11 याग आंदुर नीमी हुळकु न्यायालय दा ओतार, रा पयले टु चत्ता माळबाळेतीर क्किनाव येन अंदेव; पर जो येनारा नीमी आटोटीका हेळकु आदीत अदा अनेतीर; यतकी अनावळेरे नीव आलच, लेकीन पवत्तिर आत्मा हुन. 12 वार्ड उक वार्ड ध्वाका कोट्टान, अदकि आप्प तान पार उक कोनोर साटी नदिर्यान, अदकि पार तान आप्प उक बडोर साटी नदिर्यान अदकि चकिोर तान मोय आप्पुर खलिाप यदकु आंदरी कोन्सुस बुट्टार. 13 ☆अदकि नान हेसुर इन कारण पुरा लॉकुर नीम से दुश्मनी माळ्यार; लेकीन जो आखरी ताका आऊन मा वशिवास ईट्यार, आंदुरदा उद्धार आदीत.

महासंकट-काल

(मत्ती २४:१५-२८; लूका २१:२०-२४)

14 लेकीन याग नीव अद बरबाद माळावाळा बेकार वस्तु उक यल उचति ईलच अल नीदुरकु नोळीर, वाचुसावाळा समसंगुल आग जो लॉकुर यहूदिया दा आर आंदुर पहाळी मा ओळ्गेगुल; 15 ✨जो छत मा आर, आव तान मान्ना टु येनारा ताकोमोर साटी ल्यालमा ईळुबाळुल अदकि बुळ्क होगबाळुल; 16 अदकि आंदुर जो केई दा आर, आव तान कपळा तरोरसाटी हदि होगबाळुल. 17 आ दनिगोळ दा जो व्हाट्या दी ईरोर अदकि जो चगिद ऊरी हाल कुळ्सतेला ईतीदार, आंदुर साटी आ दनि याट भयानक ईत्तव! 18 अदकि परमेश्वर से प्रार्थना माळतेला ईरी कि ईद सोळ इन दनिगोळ दा आगबाळुल. 19 ✨यतकी आ दनि हगि बरबाद ईनव ईत्तव कि दुनया अनूद सुरूवात टु, जो परमेश्वर रच्यान, ईंगासताका ना रा आग्याव अदकि ना बाक यागलु आदव. 20 अगर प्रभु आ दनिगोळी ईला घटुसायदुन, रा यातोदु प्राणी भी ईला ऊळाईत; लेकीन आ नविळुसकु आग्यार आ लॉकुर कारण यारी आव नविळुसदुन, आ दनिगोळी गोरत माळ्यान.

21 आ समय दा अगर यावारा नीम से अंदान; नोळी, मसीह ईल आन, या नोळी, अल आन, रा वश्वास माळबाळेतीर; 22 यतकी ख्वाटा मसीह अदकि ख्वाटा भवषियवक्ता यदकु नदिर्यार, अदकि हगि-हगि चमत्कार अदकि अदभुत क्याल्सा तोरस्यार कि अगर आग सकुल रा नविळुसकु आग्यार आ लॉकुरी भी बैकुश बुळुल. 23 लेकीन नीव सावधान ईरी: नोळी, ना नीमी सप्पा मात पयले टु ना हेळ बुटीन.

मंळसा अन पार यीशु उन दुबारा बरोद
(मत्ती २४:२९-३१; लूका २१:२५-२८)

24 ✨“आ दनि दा, आ बरबाद इन बाददा दा सुरज अंधार आगेदीत, अदकि चन्द्रमा उजुळ कोळतीदील; 25 ✨अदकि आकाश टु तारागन बळिली हत्तेव; अदकि आकाश ईनव शक्तगोळी हालुसेदव.” 26 ✨आग लॉकुर ना मंळसा अन पार उक धोळ्द सामर्थ्य अदकि महमा अन्द सांगुळ बादल दा बरतेला नोळ्यार. 27 आ समय आव तानव स्वर्गदूतगोळी कळुकु, पृथ्वी इन ईद भाग टु हुळुकु आ भाग ताका, नाकु दशिया दी टु परमेश्वर तान नविळुसूद लॉकुरी जमा माळ्यान.

अंजीर इन मार इन उदाहरण

(मत्ती २४:३२-३५; लूका २१:२९-३३)

28 “अंजीर इन मार टु ईद उदाहरण कली: याग अदुरद डगाली मुलायम आगताव, अदकि याल्ला होळली हतताव; रा नीव जान्स कोमतीर की बसिल इन दनि हात्ती आव.” 29 ईदा प्रकार याग नीव ईव मातगोळी आगतेला नोळीर, रा जान्स कोमी की नान बरोद समय हात्ती आद. 30 ना नीम से खरा अनतीन की यागासताका इव सप्पा मातगोळ पुरा आगालव, आगासताका ई पीढी नोर लॉकुर सायतीदील. 31 आकाश अदकि पृथ्वी टलुसेदति, लेकीन नान मातगोळ यागलु टलुसतीदलि.

जाग्सतेला ईरी

(मत्ती २४:३६-४४)

32 ✨“आ दनि या आ घळी अन्द बारा दा यारू जान्सालुर, ना स्वर्ग ईनव स्वर्गदूत अदकि ना मंळसा अन पार; लेकीन सर्रिफ आप्प जान्सतान. 33 नोळी, सावधान ईरी अदकि जाग्सतेला ईरी; यतकी नीव जान्सालीर की अद घळी याग बंदीत. 34 ✨ईद आ मंळसा अन्द ह्यांग दशा आद, जो यात्रा दा होगाहोती तान

✨ 13:24 १३:२४ प्रकाशतिवाक्य ६:१२ ✨ 13:25 १३:२५ प्रकाशतिवाक्य

६:१३ ✨ 13:26 १३:२६ प्रकाशतिवाक्य १:७ ✨ 13:32 १३:३२ मत्ती २४:३६

✨ 13:34 १३:३४ लूका १२:३६-३८

मानना बटिकु होगुल, अदकि तान दासगोळी अधकार कोळुल: अदकि हर ऊंद मंळसा अक आऊंद कयालसा हेळबुळुल, अदकि चौकीदार उक जागसतेला ईरोद आग्या कोळुल.” 35 इदुरसाटी जागसतेला ईरी, यतकी नीव जान्सालीर कमानना नव मालकि याग बंदान, द्यावगा या आरधा ईळ्लकी, या हुंज कुगतद आ घळी या व्हातुर आगोर से पयले. 36 हगि आगबाळुल कआव अचानक बंदकु नामी मगितेला नोळबाळुल. 37 अदकि जो ना नीम से अनेतीन, अदा सप्पा मुंदुर से अनतीन: “जागसतेला ईरी!”

14

यीशु उक कोन्नोद योजना

(मत्ती २६:१-५; लूका २२:१-२; यूहन्ना ११:४५-५३)

1 येढ्ढ दनि इन बाद्दा फसह अदकि अखमीरी रोटी अनूद हाब्ब आगोद ईरोद. प्रधान याजक अदकि नयिम इन गुरु ईद मात इन खोज दा ईरोर कआऊक ह्यांग कपट देल हुळकु कोनदेव; 2 लेकीन अनतोगोर, “हाब्ब इन रोज हगि ईला, ईलारा लॉकुर दा झगळा आगेदीत.”

बैतनय्याह नगर दा यीशु उन अत्तर देल स्वागत

(मत्ती २६:६-१३; यूहन्ना १२:१-८)

3 *याग यीशु बैतनय्याह दा शमौन कोढी यारी कोढ इन रोग ईरोद आऊन मान्या ऊमली कुर्तकु ईरोन, आग ऊंद आरत संगमरमर इन बाटुल दा जटामांसी अनूद बारर शुद्ध अत्तर हुळकु बंदुर; अदकि बाटुल इक मूरूकु अत्तर इक यीशु उन ताल्ला मा लपटुसदुर. 4 लेकीन यारारा यारारा तान मन दा कुळकुळुस्कु अनली कुरतुर, “ईद अत्तर इन येती सत्यानाश माळकु आत? 5 इदुर मा यीशु अंदुन येती ईद अत्तर इक मुर सौ दीनार* से

☆ 14:3 १४:३ लूका ७:३७,३८

* 14:5 १४:५ मुर सौ चाँदी नव सकिका ऊंद वर्ष इन रोजी

यक्कुल बार्र दा मारकु कंगालगोळ दा वाटस्कु आग सकोद.” अदकि आंदुर आक इक दनकुस्ली कुरतुर.

6 यीशु अंदुन, “आकी बटिट बुळी; आकी येती सतुसतीर? आक रा नान सांगुळ भलाई माळदुर. 7 कंगाल नीम सांगुळ हमेशा ईरतार, अदकि नीव याग चाहासीर आग आंदुर से भलाई माळ सकतीर; पर ना नीम सांगुळ हमेशा ईरतीदील. 8 जो येनारा आक माळसकोर, आक माळदुर; आक नान नळसोद तयारी दा पयले टु ना नांद शरीर मा अत्तर मलुस्यार. 9 ना नीम से खरा माताळतीन कि पुरा दुनयिा दा येल्यारा भी खुशखबरी प्रचार माळदुर दा बंदीत, अल आक इन ईद क्याल्सा अन्द चर्चा भी आक इन याद दा माळकु आदीत.”

यीशु उन विश्वासघात माळोर साटी यहूदा अन्द सहमती
(मत्ती २६:१४-१६; लूका २२:३-६)

10 आग यहूदा इस्करयिती जो हन्नेळ चेलागोळ दा टु ऊंद ईरोन, प्रधान याजकगोळ हात्ती होदुन कि यीशु उक आंदुरद कय देल हुळसुसकु आंदरी सौप्स बुळुल. 11 आंदुर ईद केळकु खुश आदुर, अदकि आऊक पैस्या कोळोद स्वीकार माळदुर; अदकि आव मवका नोळोन कि आऊक हयांगारा भी प्रकार देल हुळसुसकु आंदुरद कय दा सौप्स बुळुल.

चेलागोळ सांगुळ फसह अन्द आखरी भोज

(मत्ती २६:१७-२५; लूका २२:७-१४; २१-२३; यूहनना १३:२१-३०)

12 अखमीरी रोटी इन हाब्ब इन पयला दनि, यदुरदा आंदुर फसह दा म्यांडा अन्द पाड्डा अन्द बलदान माळतोगोर, यीशु उन चेलागोळ आऊक केळदुर, “नी येन चाहासत्या कि नाव होगकु नीन साटी फसह तनिोद तयारी माळेव?”

13 यीशु तान चेलागोळ दा टु येदढ मुंदरी ईद अनकु कळुदुन, “नगर दा होगी, अदकि ऊंद मंळसा नीर इन माळका नेगुत नीमी

सकियान, आऊंद हदि आगेगेतीर; 14 अदकि आव याता मान्या होदान, आ मान्ना अन्द मालकि से अनेतीर, गुरु अनतान कि पाऊनागोळ्द ईरोद जागा पाऊनागोळ्द कमरा यल आद यदुर्दा ना तान चेलागोळ सांगुळ फसह तनिईन अद जागा यल आद? 15 आव नीमी ऊंद सजुस्कु सजुस्द, अदकि तयार माळ्द धोळ्द म्याकळोद ठकिन तोरस्थान, अल नाम साटी फसह तनिोद तयारी माळेतीर.”

16 चेलागोळ अल टु होट्टकु नगर दा बंदुर, अदकि ह्यांग यीशु आंदुर से अंददिन, हांग अच सकित्त; अदकि आंदुर फसह तनिोद तयारी माळदुर.

17 याग द्याव आत, रा आव हननेळ चेलागोळ सांगुळ बंदुन. 18 याग आंदुर कुर्तकु ऊमोर, रा यीशु चेलागोळ से अंदुन, “ना नीम से खरा अनतीन कि नीम दा टु ऊंद, जो नान सांगुळ ऊमेत्यान, आव नानी ध्वाका देल हुळसुसकु दुश्मनगोळ कय दा सौप्स कौंडान.”

19 अदकि चेलागोळ मा उदासी छासेत अदकि आंदुर ऊंद ऊंद माळकु यीशु उक अनली कुरतुर, “येन आव ना हुईन?”

20 यीशु आंदुर से अंदुन, “आंदुर नीम हननेळ दा टु ऊंद आन, जो नान सांगुळ तंळग्या दा कय हाकतान. 21 यतकी ना मंळसा अन पार, ह्यांग नान बारा दा लखिसकु आग्याद, लेकीन आ मंळसा अन मा हाय याऊन द्वारा ना मंळसा अन पार उक हुळसुसकु आदीत अदकि सौप्सकु आदीत! अगर आ मंळसा अन्द जनम अच ईला आगाईत, रा आऊन साटी भला आगाईत.”

प्रभु-भोज

(मत्ती २६:२६-३०; लूका २२:१४-२०; १ कुरनिथि ११:२३-२५)

22 याग यीशु अदकि आऊन चेलागोळ ऊमतेला अच ईरोर, आव रोट्टी ताकौंडुन, अदकि परमेश्वर उक धन्यवाद कोटकु

मुर्दुन, अदकि आव चेलागोळी भी कोट्टुन, अदकि अंदुन, “हुडी, ईद नान शरीर हुन.”

23 बाक यीशु कटोरा हुळकु परमेश्वर उक धन्यवाद माळदुन, अदकि आंदरी कोट्टुन; अदकि आंदुर सप्पा मुंदुर अदुर दा ट्टु कुळदुर. 24 अदकि यीशु चेलागोळ से अंदुन, “अद नान खुन हुन, जो हापाळ मुंदुर साटी वाहुसकु आगतद,” ईद प्रमाणति माळतद कि परमेश्वर अदकि मळसा अन न्याड्या व्हाशोद वाचा अक दर्शुसतद. 25 “ना नीम से खरा अनतीन कि अंगुर इन रास्सा आ दनि ताका बाक यागलु कुडुतीदील, यागासताका परमेश्वर उन राज्य दा ना व्हाशोद अंगुर इन रास्सा ना कुडुतीदील.”

26 बाक आंदुर भजन हाळ हाळकु व्हार्या जैतून पहाळी मा होदुर.

पतरस उन इनकार इन भवषियवाणी

(मत्ती २६:३१-३५; लूका २२:३१-३४; यूहनना १३:३६-३८)

27 आग यीशु चेलागोळ से अंदुन, “नीव नानी बटिकु ओळीर, यतकी शास्त्र हगि अच अनतद: ‘ना रखवाला अक कोनाईन, अदकि म्यांडा ततिर-बतिर आगेदव.’ 28 ☆लेकीन ना तान जत्तिता आगदुर बाद्दा नीम से पयले गलील इक होगार्इन.”

29 पतरस आऊन से अंदुन, “अगर सब नीनी बटिटार रा बटिटार, पर ना नीनी बटिकु होगालीन.”

30 यीशु आऊन से अंदुन, “ना नीन से खरा अनतीन कि ईदल्या ईदा ईळलक इक हुंज इन येढ्ढ घन कुग्गोर से पयले, नी मुर घन नान इनकार माळ्या.”

31 बाक पतरस अदकि जोर कोटकु अंदुन, “अगर नानी नीन सांगुळ सायोद भी बदिदीत, तरी ना नीन इनकार यागलु माळतीदील.”

ईदा प्रकार देल अदकि सप्पा मुंदुर भी अंदुर.

गतसमनी दा प्रार्थना

(मत्ती २६:३६-४६; लूका २२:३१-४६)

32 बाक यीशु अदकि आऊन चेलागोळ गतसमनी हेसुर इन ऊंद जागा दा बंदुर, अदकि आव तान चेलागोळ से अंदुन, “ईल कुरतकु ईरी, आगासताका ना प्रार्थना माळतीन.” 33 अदकि आव पतरस अदकि याकूब अदकि यूहन्ना अक तान सांगुळ ओतुन; अदकि च्याच दुखी अदकि व्याकुल आगली कुरतुन, 34 अदकि आंदुर से अंदुन, “नान मन च्याच उदास आद, ईल ताका कर्ना सायोर मा आईन: नीव ईल रूकसी, अदकि जाग्सतेला ईरी.”

35 बाक आव थ्वाळासा मुंद होदुन अदकि धरती मा बदिक् प्रार्थना माळली कुरतुन कर्ना अगर आग सकुल रा ईद घळी नान मा टु टल्सेगुल, 36 अदकि अंदुन, “हे बाबा, हे आप्पा, नीन से सप्पा येनारा आग सकतद; ईद दुख इन कटोरा अक नान हाती टु हटुसबुळ: तौभी ह्यांग ना चाहासतीन हांग ईला, पर जो नी चाहासत्या अदा आगुल.”

37 बाक यीशु वापस बंदुन अदकि नोळदुन कर्ना मूरू चेलागोळ मगिग्यार ईद नोळकु पतरस से अंदुन, “हे शमौन, नी मगित्या? येन नी ऊंद तास भी जाग्स सकदील? 38 जाग्सतेला अदकि प्रार्थना माळतेला ईरी कर्ना नीव परीक्षा दा बळिवाळी. आत्मा अन्द रा इच्छा आद, पर मय कमजोर आद.”

39 अदकि यीशु बाक ओळेदुन अदकि अवा शब्दगोळ्दा प्रार्थना माळली कुरतुन. 40 बाक यीशु बंदकु आंदरी मगित नोळदुन, यतकी आंदुर अव कण्णगोळ जप देल तुमकु ईरव; अदकि ईला जान्सोर कर्ना आऊक येन उत्तर कोट्टेव.

41 बाक यीशु तसिरा गन बंदकु आंदुर से अंदुन, “ईग भी नीव मगितीर अदकि आराम माळेतीर? नोळी, घळी होट्ट बंदाद; नोळी ना मळसा अन पार पापीगोळ्द कय देल हुळकु सौप्सकु

आगाईन. 42 येळी, होगीता! नोळी, नानी ध्वाका देल हुळसुसकु सौप्सावाळा नान हात्ती होट्ट बंदान!”

यीशु उन ध्वाका देल हुळकु सौप्सकु आगोद

(मत्ती २६:४७-५६; लूका २२:४७-५३; यूहन्ना १८:३-१२)

43 यीशु ईद अनतेला अच ईरोन कि यहूदा जो हन्नेळ चेलागोळ दा टु ऊंद ईरोन, आऊन हात्ती बंदुन. अदकि तान सांगुळ प्रधान याजक अदकि शास्त्रीगोळ अदकि स्याणागोळद द्वारा ऊंद धोळद भीळ कळुकु आगीत, जो तलवार अदकि कोलगोळ हुळकु बंदीदुर. 44 यीशु उक हुळसुसकु सौप्सावाळा आंदरी ईद पता कोटीदुन कि याऊक ना चुममा ताकोमाईन आवा मळसा हुन, आऊक हुळकु शंकलीगोळ देल कटकु सावधानी देल वयेतीर ताकी आव ओळ बाळुल.

45 यहूदा बंदुन, अदकि तुरन्त यीशु उन हात्ती होगकु अंदुन, “हे गुरु!” अदकि आऊन चुममा ताकोंडुन. 46 आग आंदुर यीशु मा कय हाककु आऊक हुडुकोडुर अदकि कठ कोडुर. 47 आंदुर दा टु जो हात्ती नीदुरकु ईरोर, ऊंद मळसा तलवार जेळकु महायाजक उन सेवक मा नळसदुन, अदकि आऊंद कवि हारस बुट्टुन. 48 यीशु आंदुर से अंदुन, “येन ना यावारा अपराधी हुईन, जो नानी हुडोर साटी तलवार अदकि कोलगोळ हुळकु बंदीर? 49 ✧ना रा हर रोज मंदिर दा नीम सांगुळ ईतकु उपदेश कोळतोगीन, अदकि आग नीव नानी हुळदीदलि: लेकीन ईद इदुरसाटी आग्याद कशिशास्त्र अन्द मात पुरा आगुल.”

50 इव मातगोळ केळकु आऊन सप्पा चेलागोळ आऊक आबना बटिकु वोळेदुर.

51 ऊंद हारोदव पार तान दंगदंगा मय मा लुंगी होदुकु यीशु उन हदि-हदि होगोन; अदकि लॉकुर आऊक हुडोद कोशशि माळदुर.

52 अदकि आव लुंगी बटिकु नंगा ओळेदुन.

✧ 14:49 १४:४९ लूका १९:४७; २१:३७

यहूदीगोळ्द महासभा अनूद मुंद यीशु उक तरोद आत
(मत्ती २६:५७-६८; लूका २२:५४,५५,६३-७१; यूहन्ना
१८:१३-१४; १९:२४)

53 बाक आंदुर यीशु उक महायाजक उन मान्नी तंदुर; अदकि सब प्रधान याजक अदकि स्याणा अदकि नयिम इन गुरु आऊन मान्या जमा आगेदुर. 54 पतरस दुर दुर टु आऊंद हदि-हदि महायाजक उन आंगुळ इन बुळ्क ताका होदुन, अदकि आव पहरदारगोळ सांगुळ कुरतकु बेक्की सेक्सली कुरतुन. 55 प्रधान याजक अदकि सप्पा यहूदीगोळ्द महासभा यीशु उक कोंद बुळोरसाठी आऊंद वरिध दा गवाही इन खोज दा ईरोर, पर आऊंद वरिध दा यातोद भी सबुत सकिदील. 56 यतकी हापाळ सा लॉकुर यीशु उन वरिध दा ख्वाटा गवाही कोळोर, पर आंदुरद गवाही ऊंद सारखा ईला ईरोद.

57 आग येनारा लॉकुर यदकु यीशु उन खलिाप ईद ख्वाटा गवाही कोळली कुरतुर, 58 ✧“नाव ईऊक ईद अनूत केळेव, ना ईद मंळसागोळ्द कय देल माळ्द ईद मंदरि इक केळ्द बुळाईन, अदकि मुर दनि दा दुसरा माळाईन, जो मंळसागोळ्द कय देल माळकु ईरतीदील.” 59 ईदुर मा भी आंदुरद गवाही ऊंद सारखा होटीदलि.

60 आग महायाजक न्याड्या दा नीदुरकु यीशु से केळदुन, “नी येनु उत्तर कोळाल? ई लॉकुर नीन वरिध दा येन गवाही कोळतार?”

61 लेकीन यीशु सुंगा ईत्तुन, अदकि आव येनु उत्तर कोटीदील. महायाजक आऊन से मात्त केळदुन, “येन नी आ परमधन्य परमेश्वर उन पार मसीह हुय?”

62 यीशु अंदुन, हाव “ना हुईन: अदकि नीव मंळसा अन पार उक सर्वशक्तमान इन ऊम्मा कय दी कुरत, अदकि आकाश इन बादल इन सांगुळ बर्त नोळीर.”

✧ 14:58 १४:५८ यूहन्ना २:१९

63 आग महायाजक तानव फळक्या हरकु अंदुन, “ईग नामी यक्कुल गवाहगोळ्द येन जरवत आद?”

64 “येन नीव केळीदील, कि ईव परमेश्वर उन अपमान माळतान. ईग नीम्द येन राय आद?” आ सप्पा लॉकुर आऊक अपराधी ठहरूसतेला अंदुर, कि ईऊक जीव दण्ड सीक पायजे.

65 आग यारारा आऊन मा उगुळली कुरतुर, अदकि यारारा आऊन कण्णगोळ मा पट्टी कटक आऊक बुक्का बडुली कुरतुर, अदकि आऊन से अनली कुरतुर, “भवषियवाणी माळ.” नीनी यार बळदुर, अदकि पहरेदारगोळ आऊक हुळकु क्यावरा बळदुर.

पतरस उन यीशु उक इनकार माळोद

(मत्ती २६:६९-७५; लूका २२:५६-६२; यूहन्ना १८:१५-१८, २५-२७)

66 याग पतरस ल्यालमा आंगुळ दा ईरोन, रा महायाजक इन दासीगोळ दा टु ऊंद दासी अल बंदुर. 67 अदकि आ दासीगीत पतरस उक बेक्की सेक्सत नोळकु आऊक टकटकी हचकु नोळदुर अदकि अनली कुरतुर, “नी भी रा आ नासरी यीशु उन सांगुळ ईर्या.”

68 अदकि आव बदलुसेदुन, अदकि अंदुन, “ना जान्सालीन अदकि ना सम्सालीन कि नी येन अनेत्या.” बाक आव अल टु दरवाजा ताका होदुन; अदकि आटा होती हुंज कुग्त.

69 आ दासी आऊक नोळकु आंदुर से अंदुर जो आऊन हात्ती नीदुरकु ईरोर, “ईव मळसा आंदुर दा टु ऊंद हुन.”

70 लेकीन आव मात्त बदलुसेदुन. घळी तमिर बाद्दा दा आंदुर जो हात्ती नीदुरकु ईरोर मात्त पतरस से अंदुर, “खरा दा नी आंदुर दा टु ऊंद हुय; यतकी नी गलीली भी हुय.”

71 आग आव इनकार माळकु अनली कुरतुन कि ना करिया तनिकु खरा अनतीन, “ना आ मळसा अक, यार्द नीव मातचीत माळेतीर, ना अरालीन.”

72 बाक तुरन्त दुसरा घन हुंज कुग्त्. अदकि पतरस उक अद मात जो यीशु आऊन से अंददिन याद बत्त: “हुंज इन येद्व घन कुग्गोर से पयले नी मुर घन नान इनकार माळ्या.” अदकि आव ईद मात इक सोचकु आव वरलली कुरतुन.

15

पलिातुस उन मुंद यीशु

(मत्ती २७:१-२; ११:१४; लूका २३:१-५; यूहन्ना १८:२८-३८)

1 व्हातुर आगतेला अच तुरन्त प्रधान याजकगोळ, स्याणागोळ, अदकि शास्त्रीगोळ उलटा सप्पा यहूदी महासभा आपस दा सलाह माळकु यीशु उक कट्सुसदुर, अदकि आऊक वोतकु पलिातुस उन कय दा सौप्सदुर.

2 पलिातुस आऊन से केळदुन, “येन नी यहूदीगोळद राजा हुय?” यीशु आऊक उत्तर कोट्टुन, हव “हयांग नी खुद अच अनत्या.”

3 प्रधान याजक आऊन मा हापाळ मात ईनव दोष हचचोर.

4 पलिातुस यीशु से मात्त केळदुन, “येन नी येनु उत्तर कोळाल? नोळ इंदुर नीन मा यास मात ईनव दोष हचीत्यार!”

5 यीशु फरि भी येनु उत्तर कोटीदील; ईल ताका क पलिातुस उक बळा आश्चर्य आत.

मृत्यु-दण्ड इन आग्या

(मत्ती २७:१५-२६; लूका २३:१३-२५; यूहन्ना १८:३१; १९:१६)

6 हर ऊंद फसह हाब्व इन घळी दा पलिातुस यावारा भी ऊंद कैदी इक यारी यहूदी लॉकुर चाहासतोगोर, आऊक आंदुर साठी बट्टिबुळ तोगोन. 7 बरअब्बा हेसुर ईनव ऊंद मळसा ईरोन जो आ वदिरोह इन सांगुळ कैदी ईरोन, जो रोमन सरकार उन खलिाप वदिरोह दा हत्या माळीदुर. 8 अदकि भीळ म्याकुच होगकु पलिातुस से वनिती माळली कुरत, क हयांग नी नाम

साटी माळतेला बंद्या हांग अच माळ. 9 पलातुस आंदरी उत्तर कोट्टुन, “येन नीव चाहासतीर कनि नीम साटी यहूदीगोळ राजा अक बटि बुळाईन?” 10 यतकी पलातुस जानसोन कनि प्रधान याजकगोळ आऊक सट्टि देल सौप्सदुर.

11 लेकीन प्रधान याजकगोळ लाँकुरी येर्सदुर कनि आव बरअब्बा अक अच आंदुर साठी बीटबुळुल. 12 ईद केळकु पलातुस आंदुर से मात्त केळदुन, “रा यारी नीव यहूदीगोळव राजा अनतीर, आऊक ना येन माळाईन?”

13 आंदुर मात्त चळिलासदुर, अदकि अंदुर “आऊक क्रूस मा येर्सबुळी!”

14 पलातुस आंदुर से अंदुन, “येती ईव येन बुराई माळ्यान?”

लेकीन आंदुर मात्त अदकि चळिलासदुर, “आऊक क्रूस मा येर्सबुळी!”

15 आग पलातुस भीळ इक खुश माळोद इच्छा देल, बरअब्बा अक आंदुर साठी बट्टि बुटुन, अदकि यीशु उक कोळागोळ देल बळकु सौप्सदुर कनि क्रूस मा येरसुल.

सैनकिगोळ द्वारा यीशु उन अपमान
(मत्ती २७:२७-३१; यूहनना १९:२-३)

16 सैनकिगोळ यीशु उक कलिा अन्द बुळक राज्यपाल उन मान्ना अन्द आंगुळ दा ओतुर जो प्रीटोरियुम कहलुसतद, अदकि बाकी नोर रोमी सपिाईगोळी कारूकु तंदुर. 17 आग आंदुर आऊक जांभळा रंग इन कपळा हाक्सुसदुर अदकि मुळ्ल इन मुकुट माळकु आऊन ताल्ला मा मळसदुर, 18 अदकि ईद अनकु आऊक नमस्कार माळली कुरतुर, “हे यहूदीगोळ राजा, नीन जय आगुल!” 19 आंदुर आऊन ताल्ला मा सरकण्डा बडोर, अदकि आऊन मा ऊगळोर, अदकि ट्वांगरा टेक्सकु आऊक प्रणाम माळतेला ईत्तुर. 20 याग आंदुर आऊंद मज्याक हारसकोड्डुर, रा आऊन मय मा कळ्व जांभळा रंग इन फळक्या ईळ्सकु

आऊन अवा कपळा मात हाक्सुसदुर; अदकि आग आऊक कूस मा येरसोर साठी व्हार्या ओतुर.

यीशु उन कूस मा येरसोद

(मत्ती २७:३२-४४; लूका २३:२६-४३; यूहन्ना १९:१७-२७)

21 ✨आंदरी कुरेन ईनव ईरावाळा शमौन हेसुर ईनव मंळसा, हादी मा सकिदुन. आव ऊरी टु बरोन. अदकि आव सकिन्दर अदकि रूफूस उन आप्प ईरोन. सपिाहीगोळ आऊन मा जबरदस्ती दबाव हाकदुर क्आव यीशु उन कूस नेगुकु नळदान.

22 आंदुर यीशु उक गुलगुता हेसुर इन जागा मा तंदुर, यदुर मतलब खोपळी इन जागा हुन. 23 अल यीशु उक केय मसाला मीसळुसद अंगुर इन रास्सा कोळली कुरतुर, लेकीन आव ताकोडीदील.

24 आग आंदुर आऊक कूस मा येरसदुर अदकि आऊन कपळा मा चटिटी गोळ हाक्कु, क्आ यारीक येन सकिकीत, अवरी वाट्स बुटुर. 25 याग आंदुर आऊक कूस मा येरसदुर रा व्हातरी नव ऊम्बत मुरददिव. 26 अदकि आऊन दोषपत्र लखिसकु कूस मा आऊंद ताल्ला अन्द म्याकुच चपिकुस बुटुर “यहूदीगोळ राजा.”

27 आंदुर आऊन सांगुळ येढ्ढ डाकूगोळी भी कूस मा येरसदुर, ऊंद डाकू उक ऊमा कय दी अदकि दुसरा डाकू उक डाक्या कय दी कूस मा येरसदुर. 28 आग पवत्रिशास्त्र अन्द अद वचन क्आ आऊक अपराधीगोळ सांगुळ आळुकु आदीत, पुरा आत.*

29 ✨अदकि हादी मा टु होगावाळेर ताल्ला हालु-हालुसकु अदकि ईद अन-अनकु आऊंद अपमान माळतोगोर, “वाह. मंदरि इक केळावाळा, अदकि मुर दनि दा माळावाळा! 30 तान तान इक ऊळ्स अदकि कूस मा टु ईळुकु बा.”

✨ 15:21 १५:२१ रोमियो १६:१३ * 15:28 १५:२८ ईद वचन हाळोद शास्त्र वा लखिसकु हैलेच ✨ 15:29 १५:२९ मरकुस १४:५८; यूहन्ना २:१९

31 ईदा रीतदि देल प्रधान याजक भी, शास्त्रीगोळ सांगुळ, आपस दा आऊंद मज्याक हारसकु अनतोगोर, “ईव रा दुसरा अक ऊळस्यान,” लेकीन तान तान इक ऊळस सकालुन.

32 इसत्राएल इन राजा, मसीह, ईग क्रूस मा टु ईळ्दकु बर कानाव नोळकु वशिवास माळेव. अदकि जो आऊन सांगुळ क्रूस मा येरसकु आगीदुर, आंदुर भी आऊन नीम्दा माळतोगोर.

यीशु उन जीव त्यागसोद

(मत्ती २७:४५-५६; लूका २३:४४-४९; यूहन्ना १९:२८-३०)

33 याग दुसरा पहर आत रा पुरा द्याश दा अंधार आगेत अदकि मुर मुरास ताका हांग अच ईत्त. 34 अदकि मुर मुरा दी यीशु हापाळ धोळ्द शब्द दा चलिळासकु अंदुन, “इलोई, इलोई, लमा शबक्तनी?” यदुरद मतलब हुन, “हे नान परमेश्वर, हे नान परमेश्वर, नी नानी येती बटिबुट?”

35 आग जो आऊन हात्ती ईरोर आंदुर दा टु आरधा लॉकुर ईद केळकु अनली कुरतुर, “नोळी, आव एलयियाह अक कारेत्यान.”

36 अदकि ऊंद मंळसा ओळकु स्पंज इक सरिके दा नेनाकदुन, अदकि सरकण्डे मा ईटकु आऊक नेक्सदुन अदकि अंदुन, “थाम्सेगी, नोळाता एलयियाह आऊक ईळसोर साटी बरतान का ईला.”

37 आग यीशु धोळ्द शब्द दा चलिळासकु जीव बटि बुटुन.

38 अदकि मंदिर इन परदा म्याकुच टु ल्यालमा ताका हरूकु येढ्ढ तुकळा आगेत. 39 जो सुबेदार आऊन मुंद नीदुरकु ईरोन, याग आऊक हगि चलिळासकु जीव बीळतेला नोळदुन, रा आव अंदुन, “खरा ई आद ईव मंळसा, परमेश्वर उन पार ईरोन!”

40 हापाळ आरतेर भी दुर टु नोळतोगोर: आंदुरदा मरयिम मगदलीनी, स्याणेव याकूब अदकि योसेस उन मोय मरयिम, अदकि सलोमी ईरोर. 41 याग आव गलील दा ईरोन रा इंदुर

आऊंद हदि आगोगोर; अदकि आऊंद सयावा टहल माळतोगोर; अदकि दुसरा हापाळ आर्तेर भी ईरोर, जो आऊन सांगुळ यरूशलेम दा बंदीदुर.

यीशु उक नळसोद

(मत्ती २७:५७-६१; लूका २३:५०-५६; यूहन्ना १९:३८-४२)

42 याग द्याव मुळकेत रा इदुरसाटी क्ति तयार इन दनि ईरोद, जो आराम इन ऊंद दनि पयले ईरतद, 43 अरमितयाि नव ईरावाळा यूसुफ बंदुन, जो महासभा दव सदस्य ईरोन अदकि तावा परमेश्वर उन राज्य अनूद हादी कायोन. आव हम्मित माळकु पलातुस उन हात्ती होगकु यीशु उन लाश बेळदुन. 44 पलातुस उक आश्चर्य आत क्ति आऊंद जीव ईट जल्दी होटोत; अदकि आव सुबेदार उक कारूकु केळदुन, “येन आव सोतोग्यान?” 45 याग आव सुबेदार उन बाय देल हाल केळदुन, रा लाश यूसुफ उक बेळ कोट्टुन. 46 आग आव मलमल इन ऊंद चादर कौडुन, अदकि लाश इक ईळ्सकु आ चादर दा गुंळसदुन, अदकि ऊंद कब्र दा जो चट्टान दा अगुळकु आगीत ईटदुन, अदकि कब्र अनूद दरवाजा मा ऊंद कल्ल ढकलुसदुन. 47 मरयिम मगदलीनी अदकि योसेस उन मोय मरयिम नोळतोगोर क्ति आऊक येल ईटकु आग्याद.

16

यीशु उन पुनरूत्थान

(मत्ती २८:१-८; लूका २४:१-१२; यूहन्ना २०:१-१०)

1 याग आराम इन दनि बतिसेत, रा मरयिम मगदलीनी, अदकि याकूब उन मोय मरयिम, अदकि सलोमी सुगन्धति अत्तर कौडुर अदकि बंदकु यीशु उन लाश मा हच्चेव. 2 यहूदीगोळ्द अनुसार हप्ता अनूद पयला दनि आयत्यार इन व्हातर्या अनूद आर मुरा याग सुर्य होळ्त, आंदुर कब्र मा बंदुर, 3 अदकि आपस दा

अनतोगोर, “नाम साटी कब्र अनन्द दरवाजा मा टु कल्ल याव ढकलुसयान?” ⁴ कल्ल हापाळ धोळद ईरोद. याग आंदुर कण्ण नेगुकु नोळदुर रा कल्ल कब्र टु हटुस्कु ईरोद. ⁵ आ आर्तेर याग कब्र अनन्द बुळ्क होदुर रा आंदुर ऊंद स्वरूगदूत उक हारोदव मंळसा अन घाई बळिवे कपळा मा ऊमा कय दी कुर्तकु नोळदुर, अदकि हापाळ अंजेदुर.

⁶ स्वरूगदूत आंदुर से अंदुर, “अंजबाळी, नीव नासरत इन यीशु उक ढुंढसैतीर, याऊक कूरुस मा येरुसकु आगीत. आव जत्तिता आग्यान, ईल हैलेच; नोळी, ईदा अद जागा हुन, यल आंदुर आऊक ईटीदुर. ⁷ *लेकीन नीव होगी, अदकि आऊन चेलागोळ अदकि पतरस से अनी का आव नीम से पयले गलील इक होदान. ह्यांग आव नीम से अंददिन, नीव अल्या आऊक नोळीर.” ⁸ अदकि आ आर्तेर होटकु कब्र टु वोळेदुर; यतकी थरथराहट अदकि घबराहट आंदुर मय दा तुम्मेगीत; अदकि आंदुर यारदारा से येनु अंददील, यतकी आंदुर हापाळ अंजकु ईरोर.

मरयिम मगदलीनी इक यीशु उन काळसोद
(मत्ती २८:९-१०; यूहनना २०:११-१८)

⁹ आयत्तार इक व्हातुर आगतेला अच यीशु जत्तिता आगकु पयले मरयिम मगदलीनी इक काळसदुन. आकनि दा टु आव येळ दुष्टआत्मागोळ तेगदीदुन. ¹⁰ आक होगकु यीशु उन संगीगोळी जो शोक दा मुळ्ककु ईरोर अदकि वोरलोर, ईद समाचार कोट्टुर. ¹¹ आंदुर ईद केळदुर का यीशु जत्तिता आन अदकि मरयिम मगदलीनी आऊक नोळ्यार, रा आंदुर आकनि मातगोळ मा वशिवास माळीदील.

येढ्ढ चेलागोळी यीशु उन काळसोद
(लूका २४:१३-३५)

* 16:7 १६:७ मत्ती २६:३२; मरकुस १४:२८

12 ईदुर बाद्दा दा यीशु दुसरा रूप दा आंदुर दा टु येढ्ढ चेलगोळी याग आंदुर ऊर इन दी होगोर, कांळसदुन. 13 आंदुर भी होगकु दुसरा चेलगोळी ईद समाचार कोट्टुर, लेकीन आंदुर फरि भी आंदुर्द मातगोळ मा वशिवास माळीदील.

हनहंद चेलगोळी यीशु उन कांळसोद

(मत्ती २८:१६-२०; लूका २४:३६-४९; यूहन्ना २०:१९-२३; प्रेरतिगोळ १:६-८)

14 यीशु आ हनुन चेलगोळी भी कांळसदुन, याग आंदुर ऊमली कुरतीदुर, कांळसदुन, अदकि आंदुर्द अवशिवास अदकि मन इन कठोरता मा आंदरी दनकुसदुन, यतकी यार आऊंद जतिता आगदुर बाद्दा आऊक नोळीदुर, आंदुर आऊंद वशिवास माळीदील. 15 अदकि यीशु चेलगोळ से अंदुन, “नीव पुरा दुनया दा होगकु पुरा दुनया अन लॉकुरी खुशखबरी प्रचार माळी. 16 जो वशिवास माळयार अदकि बपतस्मा ताकोंडार आऊंदा उद्धार आदीत, लेकीन जो वशिवास माळतीदील आऊंद न्याय आदीत अदकि आऊक दोषी ठहूसकु आदीत; 17 वशिवास माळावाळेर दा ईव चन्ह ईत्ताव का आंदुर नान हेसुर देल दुष्टआत्मागोळी तेगदार, अदकि व्हासा व्हासा भाषा माताळ्यार, 18 अदकि आंदुर हाव इक नेगु कोंडार, अदकि अगर आंदुर जयर भी कुडु कोंडार रा आंदरी येनु नुकस्यान आगतीदील; आंदुर बमिारगोळ मा कय मंळस्यार, अदकि बमिार चंगा आगेदार.”

यीशु उक स्वर्ग दा नेगुकु आगोद

(लूका २४:५०-५३; प्रेरतिगोळ १:९-११)

19 प्रभु यीशु आंदुर से माताळदुर बाद्दा दा स्वर्ग मा नेगुकु आदुन, अदकि परमेश्वर उन ऊम्मा कय दी कुरतुन.

20 अदकि आंदुर होटकु हर जागा मा प्रचार माळदुर, अदकि प्रभु आंदुर सांगुळ क्याल्सा माळतेला ईत्तुन, अदकि आ चनिह अन्द द्वारा जो सांगुळ सांगुळ आगतोगोव, वचन इक मजबूत माळतेला ईरोन. आमीन.*

* 16:20 १६:२० इव आयतगोळ हस्त लखित हाळोद शास्त्र दा सक्कीदील

परमेश्वर उन खरा वचन

**The Holy Bible in the Holiya language of India: परमेश्वर
उन खरा वचन**

copyright © 2020 The Word for the World International

Language: Gohllaru (Holiya)

Contributor: The Word for the World International

परमेश्वर उन खरा वचन
व्हाशोद नयिम, 2020

The New Testament in Holiya Language

The Word for the World International

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-04-08

PDF generated using Haiola and XeLaTeX on 21 Feb 2024 from source files dated 9 Apr 2023

3943f9d0-5b35-54ad-8e8f-1b7bf74924c6